



सानसेयारि 'बड'सा' खरीरालाइयाव
समाज्यादि जिउजो लोखा थनाय रायथाय, खन्थाय,
सल', सल'बाथा आरु हावबायादि थावनि, पार्क
बाइदिनि न्यायाव लिउनाय लिउबिबाँ दैथाय डर!
सानसेयारि 'बड'सा' खरीरालाइया सेबरानानै
फोसावगोन।
बड'सायाव लिउरुनायनि दुबा खालाम,
'बड'सा' खरी नोथां, जो बयबो आंगो खालाम।
सानसेयारि बड'सा मावखुलि
माडबं नोगोर, जोहोलाव दैमालु लामा
कक्राझार, बिदिसि-783370
Website: www.bodosanewspaper.com

BODOSA ★ A Bodo News Daily ★ Tuesday ★ 23 April, 2024 Kokrajhar, BTC, Assam ★ Vol.- 34, Issue No. 27 ★ R.N.I. Regd.No. 40994/91, Assam Govt. Regd.No. IPRD.40/2006/3, ★ Rs.8/-

3थि खोलोबनि
बिसायख 'थिनि थाखाय सा
8 बिजाथिफोरनि
बिजाथिलाइखौ नेवसिबाय
आरो सा 5 बिजाथिफोरा
बोखानानै लाफिनबाय

केरेलायाव गिबि मन्थि ड० हिमन्त बिश्व शर्मानि बिसायख 'थि फोसावदिनाय

कंग्रेसआ गोहोआव फैफिनोब्ला हादरनि धोनखौ मुस्लिमफोरनो सान्नानै होफिनगोन : हिमन्त बिश्व शर्मा

दिसपुर, 22 एप्रिल: 3 थि
खोलोबयाव खुंफुजानो गोनां
मोन ब्रै लकसभा बियाबनि
बिसायख 'थिनि थाखाय
गथायनो बिजाथिलाइनि
फोरमानलाइखौ आन्जाद
खालामनानै सा 8 बिजाथिफोरनि
बिजाथिलाइखौ नेवसिबाय
होन्ना मिबथिनो मोन्नाय जादों।
कक्राझार बियाबनि सासे, धुबुरी
बियाबनिफ्राय सा 4, बरपेटा
बियाबनिफ्राय सा से आरो
गुवाहाटी बियाबनिफ्राय सा 2
(□ 5 बिलाइआव)

तिरुवनन्तपुरम, 22 एप्रिल:
हादरनाडै लकसभा
बिसायख 'थिनि गिबि
खोलोबनि भट आजावनाया
थानाय 19 एप्रिलखालि
खुंजानायनि उनाव बे समाव
उननि खुंजानो गोनां
खोलोबफोरनि लकसभा
बिसायख 'थिनि थाखाय
दासादि दुलाराय हादरनाडे गुबुन
राजखान्थि दोलोफोरनि
बिसायख 'थि फोसावदिनाया
(□ 5 बिलाइआव)



कंग्रेसखौ लाथिख' खालामनानै
मुसलमानखौ थगायग्रा दालालखौ
फोजोबसांगोन : पिजुस हाजरीका



नगाव, 22 एप्रिल: 26 एप्रिलाव आसामाव नैथि खोलोबनि
बिसायख 'थिआ खुंफुजानो थांगासिनो। बिसायख 'थिनि समआ
गेजेराव माखासेल' सान थानाय समावनो नगाव लकसभा
बियाबनि रजखान्थि दोलोफोर बिसायख 'थि फोसावदिनायाव
मुखुब जाना थानायखौ नुनो मोन्दों। खुंथाय गोहोआव थानाय
बिजेपि दोलोआबो बियाबआव शुरेस बरानि जानानै
बिसायख 'थि फोसावदिनायखौ (□ 5 बिलाइआव)

लकसभा बिसायख 'थि-2024

कक्राझार बियाबनिफ्राय सा 1 2 बिजाथिफोरा बादायलायगोन

कक्राझार, 22 एप्रिल: फैगो
7 मे अक्टखालि खुंजानो गोनां
राइज्योनि 3 थि खोलोबयाव 1
नं. कक्राझार लकसभा
बियाबआव गासै सा 16
बिजाथिफोरा नमिनेसनलाइ
गथायदोंमोन। जायखौ लानानै
दिनै जोबथा बिजाथिफोरनि
फारिलाइयाव सा 12
बिजाथिफोरनि मुंफोरा
थिसनफाजादों। मख'नो
गोनांदि, खेबनै एमपि महरै
बिबानाव थानाय नब कुमार
(□ 5 बिलाइआव)



कक्राझारआव एमपि नब' कुमार शरनियानि खौरंगिरि मेल

कक्राझारआव टर्च लाइट जोंथारगोन : नब' कुमार शरनिया

कक्राझार, 22 एप्रिल:
कक्राझारआव टर्चलाइटआ
जोंथारगोन' बे बाथ्राखौ बुंदों
कक्राझार लकसभा
बियाबनिफ्राय खेबनै एमपि
जानाय नब' कुमार शरनियाआ।
दिनै कक्राझार प्रेस क्लबाव
जिएसपि दोलोनि बिजाथि
बिनिता डेकाखौ लाफानानै
बारग' एमपि नब' कुमार
शरनिया मोनसे खौरंगिरि मेल
खुंनानै बे बाथ्राखौ बुडे। बिथाड
बिनिता डेकाखौ बिबान गोनां
सासे सोद्रोमा महरै जिएसपि
दोलोयाव खामानि मावबोदों



आरो बिथांखौ दोलोनिफ्राय
बिजाथि महरै फसनाय जादों
होन्नानै फोरमायनानै नब' कुमार
शरनियाआ गेना-गोरान्थि थानो

बुडो। मख'नो गोनांदि,
कम्पियटर इन्डिनियार बिनिता
डेकाआ दावगालांगोन होन्ना
बिथाडा दाबि खालामो।
जिएसपिनि बिजाथि बिनिता
डेकाआ सदनआव गुबुन-गुबुन
हारि-माहारिनि जेनाफोरनि
सायाव गारां दैखांगोन होन्ना
फोरमायनानै शरनियाआ
बिदिसिआव गोजोन-
लाबोनाय, मोन 6 हारिनो एसटि
होनाय आरो गुबुन गुबुन हारि-
माहारिनि लाइमोन जलैनो साखि
(□ 5 बिलाइआव)

भबानिपुर धुमारपुरनि फहुमारा
दैसायाव डाक बिफाननि
गारिआ जाब्रबथाय सोमजिदों



भबानिपुर, 22 एप्रिल: भबानिपुर पुलिस बादानि सिडव थानाय
धुमारपुरआव दिनै फुबिलि समाव सामलायनो हायै जानानै गंसे
मुवा-बेसाद लांग्रा गारिआ फहुमारा दैसायाव गोलेलाडे। मख'नो
गोनांदि, 27 नं. माहारियारि राजा लामानि धुमारपुरआव दिनै फुबिलि
समाव सोनाब बंग'नि डब्लिड 73 (□ 5 बिलाइआव)

दिल्ली एनसिआर बर' थुनलाइ आफादआ
रंजालि बैसागु फोर्बो आरो सावराय मेल खुंदों

दिल्ली, 22 एप्रिल: दिल्ली
एनसिआर बर' थुनलाइ
आफादआ थानाय 2
एप्रिलखालि गाजा-गोमजायै
रंजालि बैसागु फोर्बो
फालिनायजों लोगोसे 21
एप्रिलखालि मिरु बर' थुनलाइ
आफादिन आफादगिरिजों मोनसे
सावराय मेल खुंडो। दिल्ली
एनसिआर बर' थुनलाइ
आफादआ गांसे रुदाब बिबुंसरनि
गेजेरजों फोरमायहरनाय
बादिब्ला, थानाय 20
एप्रिलखालि दिल्लीनि



मालबिया नोगोराव थानाय
पुलिस कमप्लेक्स न'ब्लाडव

खुंनय रंजालि बैसागु फोर्बोआव
गाहाइ आलासि महरै मिरु बर'

थुनलाइ आफादिन आफादगिरि
(□ 5 बिलाइआव)

बिसि-फंबाइखौ एसिदजों
गाग्लोबनानै गावखौनो
पुलिसनो गथायदों

दरं, 22 एप्रिल: गावनि असे बिसि आरो फंबाइखौ एसिदजों
गाग्लोबनानै गावखौनो थानायव आखाइ दैखों हैनाय जाथाइखौ
लानानै ओन्सोल नाडै गोमोनाय थासारि सोमजिदों। मोनानि
11:30 रिगायाव जानाय बे जाथाइखौ लानानै दरं पुलिसआ
जाथाइनि सोमोन्दै गुदि-खिथा नाइबिरसनयायखौ नुनो मोन्दों।
मख'नो गोनांदि, थानाय मोनाबिलियाव मंगलदै थानायव
सहरनि 2 नं. वार्डनि थागिबि आक्तर हुसेनआ थानायव
नुजाथि हैनानै गावनि बिसि आरो फंबाइखौ गाग्लोबनानियनि
सोमोन्दै फोरमायनानै लायो। बे बाथ्राखौ मिबथिनानै मंगलदै
पुलिसआ जोखोम जानानाय आइजो जों लोगोसे फंबाइखौबो
फाहामथाइनि थाखाय फाहामसालियाव लांनय जायो।
गिबियाव मंगलदै सरकारि (□ 5 बिलाइआव)

कलाइगावनि ब्राइट लाइभ इंग्लिस गोजौ फरायसालिनि
फिथाइआ मिजिंथिनाय बायदियै ओंखारदों

कलाइगाव, 22 एप्रिल:
बावैसो फोसावजानाय गोजौ
फरायसालि मेट्रिक आन्जादयाव
कलाइगावनि गंसे गावआरि
सोलोथाय फसंथान ब्राइट लाइभ
इंग्लिस गोजौ फरायसालिनिफ्राय
जाफुंसारै उथ्रिसारनो हादों।
मख'नो गोनांदि, उदालगुरि
जिल्ला कलाइगावनि गेदेर



ओन्सोलनि गुबुन गुबुन
सोलोथाय फसंथानफोरनिखुइ
100 जौखोन्दो बे सोलोथाय
फसंथाननिफ्राय आन्जादनि
फिथाइ ओंखारनायाव बिमा-
बिफाफोरजों लोगोसे
फरायसाफोरा रंजाखांनय
फोरमायदों। मख'नो गोनांदि,
(□ 5 बिलाइआव)

कक्राझाराव फातेमाबाद साहा बागान
सामलायगिरिनि हेंथायै हेंथा सोमावसारदों

कक्राझार, 22 एप्रिल: मानस
माहारियारि पार्कनि सिडव
थानाय फातेमाबाद साहा
बागाननि सामलायगिरि रजेश
जालानखौ बोखारनाय एबा
होखारनायनि दाबियाव दिनै
बिदिसिनि सदर कक्राझारआव
दुहाव थासारि सोमजिदों।
मख'नो गोनांदि, कक्राझार लेबार
बिफाननि गाहाइ बिबानगिरिनि



मावखुलियाव फातेमाबाद साहा
बागानाव खामानि मावग्राफोय
बायदि स्ल'गान होनायजों

माहारियारि पार्कनि सिडव
थानाय फातेमाबाद साहा बागान
आरो बादशाह फातेमाबाद साहा
बागानखौ लेबार आरो
मावफारियाफोरनो जेबो सिगांग्रो
फोरमायथि होयालाने सो
सामलायगिरि रजेश जालानआ
बन्द' खालामना दोन्दोंमोन। बे
(□ 5 बिलाइआव)

गसाइगाव जितनाल नार्जिनारि
इराजि फरायसालिनि उथ्रिसारनाय
फरायसाफोरखौ मान बावदों

गसाइगाव, 22 एप्रिल: थानाय शनिबारखालि फोसावनाय मेट्रिक
आनजादिनि फिथायाव गसाइगाव महकुमानि सिडव थानाय
सनकशन जितनाल नार्जिनारि इराजि फरायसालिनि फरायसाफोरा
100 जौखोन्दो उथ्रिनो हानानै बिमा-बिफा फोरंगिरि आरो
फरायसालिनि थाखाय गोगानाय लाबोनो हानायखौ नुनो मोन्दों।
थानाय आनजादाव गासै सा 19 फरायसाफोरा आनजाद होदोंमोन
वेनिनो गासैबो फरायसाफोरांनो (□ 5 बिलाइआव)

नाग्रिजुलि आन्सलिक आसुनि बान्जायनायाव रडालि बिहु फोर्बो खुंदों

तामुलपुर, 22 एप्रिल: तामुलपुर
जिल्लानि नाग्रिजुलियाव
नाग्रिजुलि अम्बिकागिरि आफाद
आरो गामियारि बिजाब बाखि
लांगोनायाव दिनै सानसेनि
हाबाफारिजों नाग्रिजुलि
आन्सलिक फरायसा आफादिन
बान्जायनायाव सेथि बोसोरारि
आसामयारिनि आंगोनि रडालि



बिहु फोर्बो खुंनय जादों।
हाबाफारि बायदियै दिनै फुनि

9:00 रिगायाव दुलाराय आसाम
फरायसा आफादिन

फिरफिलाखौ बिरहोदों
नाग्रिजुलि आन्सलिक फरायसा
आफादिन आफादगिरि
हिरकज्यति मेथीआ। 9:15
रिगायाव बिहुनि फिरफिलाखौ
नाग्रिजुलियाव थानाय
जांरिमिनारि गोजौ थाखोनि
सोलोथाय फसंथान कातरबारि
(□ 5 बिलाइआव)

सरुपेतानि आर्यभक्त एकाडेमि सेनियर
सेकेन्डारियाव 100 जौखोन्दो उथ्रिसारदों



भबानिपुर, 22 एप्रिल: सरुपेतानि गावआरि खोन्दोनि गिबि सारिनि
सोलोथाय फसंथान आर्यभक्त एकाडेमि सेनियर सेकेन्डारि
फरायसालियाव बावैसो सान सिगां फोसावजानाय मेट्रिक आन्जादनि
फिथाइ फोसावनायाव मोजाडै (□ 5 बिलाइआव)

सुजुगिरिनि खोलोम मुलाम्फा गोनां आबाद मावनाय

मौनफ्रम गोथां-थाजिम मैगंआनो सुबुं देहानि थाखाय गोनां। मैगं हारिफोरनि गेजेराव मैखुनावबो गोबां बिबांनि प्रटिन, भिटांमिन बाइदि बेसातफोर आबुं थायो। बेखायनो मैखुनखौ गासै थाखोनि सुबुंफोरनो बोजबो। सुबुं देहायाव गोनां जानाय नांगौ मुवाफोरनि गेजेराव मैखुननि बान्जानायनाय बयनिखुइबो सिगां होन्नानै बुडो आदार रोंग 'फाफोरा। बेराफारसै मैखुनखौ बर 'फोरा जाथोसे मोजां मैगं होन्नानै गोबांथार बाहायनाय नुनो मोनो। मोनसे समाव जॉनि राइज्योयाव हाग्रांनि मिबथिमोनै मैखुन जानानै थैनायनि खौरां खोनानो मोनसो गारोमोन। मानोना बै समाव आथिखालनि बादि गोनांखो आदोबजो बानायनानै दिहुनाय बाइदिसिना रोखोमनि मैखुन मोनो थाडमोन। हाग्रायाव मोनफुनो हानाय मैखुनफोरखौनो सुबुंफोरा बुधुमनानै जानायवनो खैफोद नुजायोमोन।

गुबुन गुबुन मैगं-थाइंगंफोरखौ आथिखालनि समाव सुबुंफोरा बाइदिसिना आदोब-खौसल बाहायनानै बाडय सम, 'एसेल' खरसा आरु गुसेब हाफोरनो आबाद मावनानै जानो गोरो जाबाय। बेल' नड जायगायाव, ओन्सोलाव मोनो थाडै बाइदिसिना रोखोमनि गोदान-गोदान जाथो आरु जोलैनि मैगं-थाइंगं आरु फिथाय-सामथायनि बिफां फुलि बुधुमनानैबो बाइदि रोखोम फिथाय दिहुनानै जानो गोरो जाबाय। मैगं-थाइंगल' नड माय-बेसर, सिबिनिफ्राय लानानै गासै रोखोमनि गोदान गोदान जोलैनि आबाद मावनानै फिथाय फसलबो दिहुनो हानाय जाबाय जॉनि आबादयारि आरु सुबुंफोरा। बेनि गेजेराव खायफाया नख 'रव सोलिनो हानाय एवा गुबुन राइज्योनिफ्राय सौफेनाय मैगं-थाइंगंनि सोलायै गावनि आखायजो रसायनिक हासार आरु एम्फो-एनला थैनायनि मुलिआरि बाहाया जासेनो एरैनो मावनाय मैगं-थाइंगं आरु गुबुन फसलफोरखौ दिहुनानै जानायवा आखा-फाखा जाबो नो हर्दो।

आथिखालनि बे इन्टरनेट मुगानि समाव सुबुंफोरनाव जेखौ गोसो बेखौनो मबाइलनि हेफाजाबै सुलु लानानै मोजां गुणनि जोलै बेगर बिहरनायनिबो राहा फैबाय। बिबिदो जौगा जोलैनि बाइदिसिना फिथाय-सामथायनिफ्राय लानानै मैगं-थाइंगं आबाद आवनाय, दाव-हांसो फिसिनानै बेदर-बिदै दिहुनाय, 'बोरमा-अमा फिसिनाय, ना फिसिनाय, फालांगियारि बिथिडै समाबाय महरै बेसर-सबाय, सिबिं आरु बाइदिसिना गोबाव सम दोमथुमनानै दोनजाग्रा मैगं-थाइंगंफोरनि गोदान जोलै आरु जौगा माननि बेगर-जोलै बुधुमनानै आबाद मावनायाव गोबां मुलाम्फा मोनो हानायबो जादो जॉनि आबादयारिफोरा। बेनि जाहोनाव आबादयारिफोरजो लोगोसे गोबांथार सुबुंफोरनो आबाद मावनायनि आदोब-सोलो मोनानै बेनि हेफाजाबै न'नि सोरगिदि सिमनानि सिडावबो बिबार बारिजो लोगोसे गावसोरनो नांनय गोबां जाथोनि मैगं-थाइंगं आरु फिथाय-सामथायनि बागान खालामनाय नुनो मोननाय जाबाय।

दिनैनि फान्जामुथि

राशि बाइदियै मुनि गिबि हांखो

मेष : अ ल बृष : ऊ ब (उ ए इ) मिथुन : क छ (ड ङ) कर्कट : ड ह सिंह : म ट कन्या : प ट (ण ष) तुला : त र बृश्चिक : ब न धनु : ध भ (ढ फ) मकर : ख ज कुम्भ : ग श (स) मीन : द च (ख ज झ)

मेष: बहाबाफोर दावबायहैनो मोनो हागौ। गोजोन मोनगोन। मोजां सम।

बृष: फरायगिरिनि थाखाय गाहाम सान। फरायनायाव दावगालानो हागोन।

मिथुन: फारफोमथिबो सान्नाय-हनाय गियानआ बांगोन। गोजोनै सम बारहोनो हागोन।

कर्कट: जैबो रंजा-बाजा खालामनानै समखौ बारहोनो हागोन। फारफोमथिनिफ्रायबो मोजां।

सिंह: लोगो-दिगिनिफ्राय माबाफोर मुवा-बेसाद मोनो हागोन। मुलाम्फा जागोन। मोजां सान।

कन्या: सोरनिबा रवआव दुखु मोनो हागौ। गोसो हमथानाया गाहाम।

तुला: सोलेंथायाव मोजां मुं मोनो हागोन। बयजोबो बाखाय जानो मोनगोन।

बृश्चिक: गोसोखौ शान्ति गैयै मोनो हागौ। जेरावबो धैज्य गैयै जागोन। गोसोखौ हमथा।

धनु: सोरनिफ्रायबा माबाफोर अजदफोर मोनो हागौ। गोसो हमथानानै था।

मकर: माबाफोर मुवा-बेसाद खहा जानो हागौ। गोसोखौ शान्ति गैयै मोनगोन।

कुम्भ: जेखि बादाया मानो देहासार जानो हागोन। मोजां सान।

मीन: सोरबा नख 'रनि आंगोनि थाखाय जिंगायाव गोलैनो हागौ। गोसोखौ शान्ति गैयै मोनगोन।

बिहार-झारखान्डजों लोगोसे माखासे राइज्योफोराव दुंखावनायनि एलाट

गोदान दिल्ली, 22 एप्रिल : फारसेथिं हाजोफोरव गोबां अखा आरु बरफ गोलैनाया सोलिगासिनो दडा। बेरा फारसे, हायेन ओन्सोलफोराव बहाबा गरम आरु बहाबा दुंखावनायजों सुबुंफोर जेनायाव गोलैगासिनो दडा। बेनि गेजेरजों दिल्लीयावबो गरमा आरुबाव खेबसे जागायबावबाय। बिफाननि बायदिव्ला, फैगौ सानफोरव दिल्लीयाव गोखों सान्दुडा सुबुंफोरखौ जेनायाव खोखलैनो हागौ। बेनि गेजेरजों समबारखालि बहाबा-बहाबा अखा हानायजों एसे रेहाय मोनो हागौ। बेरा फारसे दिल्लीनि अनगायै उरिष्या, छतिसगड आरु बिहारनि माखासे बाहागोफोराव दुंखावनायनि थासारि सोमजियो। बिफावनि बायदिव्ला, 22 एप्रिलाव सोनाब बंगनि अनगायै आलादा-आलादा बाहागोफोराव दुंखावनाय थासारिया सोमजियो



हागौ। बेनि अनगायै बिहार, झारखान्ड आरु उरिष्यानि आलादा-आलादा बाहागोफोराव दुंखावनाय आरु गोखौ दोहौनि थासारि सोमजियो हागौ। दिल्लीयाव बोथोर सोलायनायनि गेजेरजों आरुबाव खेबसे गरमा जागायबावनो हागौ। समबारखालि माखासे ओन्सोलफोराव खावसे महरै जोमै साग्लोबगोन होन्ना बिफानआ हमदादों। बेराफारसे घन्टायाव 25-35 कि:मि: गोखौथिनि बार बारगोन। लोगोसे बहाबा-बहाबा सरासन्हा अखा हानायनिबो मिजिं दडा। बे

मालद्विपनि संसदारि बिसायख'थियाव पिएनसिआ बांसिन भट मोन्दों



जामहुरी पार्टीया 1-1 मासि देरहायो। रबिबारखालि संसदारि बिसायख'थिया फुनि 8 रिंगानिफ्राय जागायनानै बेलासिनि 5:30 रिंगायाव जोबथादों। गासै मोन 6 राजखान्थि दोलो आरु उदां हान्जाफोरा संसदिनि मोन 93 मासिफोरनि थाखाय गासै सा 368 बिजाथिफोरखौ बिसायख'थि फोथाराव बादायहोदों मोन। पिपुल्स नेशनल कंग्रेसआ मोन 90 बियाबफोराव बिसायख'थि बादायदों। फारसेथिं गाहाइ बेरेखा दोलो मालद्विबियान डेमक्रेटिक पार्टीया मोन 12 मासि देरहायो आरु उदां बिजाथिफोरा मोन 10 मासियाव देरहासार जायो। फारसेथिं मालद्विप डेभलपमेन्ट एलाइन्स आरु

राफायाव इज्राइलनि गाग्लोबनायाव सा 23 फिलिस्तानीफोरनि जिउ रवहा

जेरुजालेम, 22 एप्रिल: गाजा पट्टीआव इज्राइल सान्थ्रिनि गाग्लोबनाया सोलिगासिनो। शनिबारनि मोनायाव मिश्र सिमनानि सहर राफाहयाव इज्राइलआ उरांजों गाग्लोबदों, जेराव सा 22 फिलिस्तानीफोरनि जिउ गोमायो। थैनायफोरनि गेजेराव सा 18 उन्दैफोर दंफायो। बेनि सानसे सिगां इज्राइलनि गाग्लोबनायजों राफायाव सा 9 सुबुंफोरनि जिउ गोमादोंमोन, जेराव साने आइजो आरु सा 6 उन्दैफोर दंफायोमोन। मख 'जाथावदि, गाजानि गुबुन-गुबुन ओन्सोलफोरनिफ्राय फेनाय 14 लाख सुबुंफोरा राफायाव आख्य लानानै दडा। बेयाव हामास आरु इस्लामिक जिहादिनि दावहा नांग्रा सोद्रोमाफोरा थाखोमानानै दड होन्ना सन्देहजों इज्राइलआ हा सा सान्थ्रिजों गोखों यजनाखौ से खावसे दाननिफ्रायनो सोलिहोगासिनो। नाथाय गोखों दावहा जानानै गोबां जिउ गोमागोन आसाजों आमेरिका, इउरपियान हादत आरु इउएनआ इज्राइलनि बेबादि गाग्लोबनायखौ होबथानो नाजादोंमोन। नाथाय 14 एप्रिलाव इज्राइलआव इरानआ गाग्लोबनायनि उनाव फिनजाथाइ होना इज्राइलनि गाग्लोबनायखौ होबथानो थाखाय आमेरिकाया राफायाव नायबिजिरनायनि थाखाय इज्राइल सान्थ्रिनो माखासे रेहाय होनायनि बाश्रा



वुंदों। आमेरिकानि गनायथि मोनानै इज्राइलआ राफायाव अखांजों गाग्लोबनायखौ गोखोंसिन खालामदों होन्ना गनायथिनाय जादों। बेनि सिगां राफायाव गाग्लोबनायनि थाखाय इज्राइलनि उरांआ माब्लाबा समावल' बेनिथिं मोखां जालाडोमोन। बावैसो सिगां राफायाव गोदानै खेबने गाग्लोबनायनि मोनसे गाग्लोबनायाव नख 'रसेनिनो सानै आइजो आरु सा 17 उन्दैफोरनि जिउ गोमादों। फारसेथिं नैथि गाग्लोबनायाव सासे हौवा सुबुं, सासे आइजो आरु बिनि 3 बोसोरनि गथ'आबो जिउ गोमायो। गाजायाव 7 अक्ट'बर 2023 निफ्रायनो इज्राइलनि गाग्लोबनायाव सा 34,000 नि बांसिन फिलिस्तानीफोरनि जिउ गोमाबाय। आमेरिकान संसदिनि सदन थान्दै आफादआ शनिबाराव इज्राइलनो 26 आरब डलारनि मदत होनो नाजानाय बिथांखि खालामो, जेराव गोबां रोखोमनि हाथियार आरु गुलि-बारुदआबो

गिबि मन्थि केजरिवालनि डक्टरजों भिडिअ कन्साल्टेशन खालामनो आर'ज गावनायखौ इडिआ हेंथा होदों

गोदान दिल्ली, 22 एप्रिल: अरबिन्द केजरिवालनो तिहाइ जेलाव इन्सुलिन होनायखौ लानानै सोलिबाय थानाय दान्थे-बिदान्थेआ जोबथानायनि पासै फेयालासे बांसिनसो जाबोदों। तिहाइ जेलनि रिपटखौ बिथा खालामनानै बिबानगिरिफोरा बुंदोंमोनदि, केजरिवालआ थानाय माखासे दाननिफ्रायनो इन्सुलिननि इन्जेक्सन लानायखौ बन्द'खालामदोंमोन आरु हमजानाय समाव बिथाड मेटफार्मिनि मुनि मोनसे सरासन्हा डायबिटिज होबथानायनि मुलिखौ जागासिनो दंमोन। केजरिवालआ तेलेंगानानि सासे प्राइभेट डक्टरजों डायबिटिजनि फाहामथाय लादों। आपनि मन्थि आतिशोआ बेनि सायाव मोनसे प्रेस कन्फेरेन्सआव बुडोदि, अरबिन्द केजरिवालआ गावनि डायबिटिस स्पेशलिस्ट डक्टरजों भिडिअ कन्साल्टेशन खालामनो आरज गावदोंमोन।



नाथाय इडि आरु तिहाइ जेल खुंथाया बेखौ अजद होदों। लेडाइ राइज्यो बेंगिरि भिके साकसेनाया बुंदोंदि, गावसोर अरबिन्दखौ डक्टरजों भिडिअ कन्फेरेन्सिं खालामहोनाय नड। आतिशोआ बुंदोंदि, एम्सनि डक्टरजों कन्साल्ट खालामहोगोन होन्ना बुंदोंमोन। एम्सनि डक्टरफोरनि बाथा बुडो अब्ला बिथाड एम्सनि जायखि जाया डक्टरजों अरबिन्द केजरिवालखौ बाथा रायजलायहोयाखै मोन। सानैसो सिगांसिमाव बिथाड एम्सआव डक्टरनि थाखाय आरजबो गावखैमोन। कर्टआव बिथांमोननिफ्राय बुंनया जादोंदि, एम्सनि डक्टरफोरा डाइट साट बानायदों आरु बेखौ लानाने इन्सुलिन होनायखौ अजद होदों। नाथाय बे चार्टखौ डायबिटिज डिपार्टमेन्टनिफ्राय बानायखाबै, सरासन्हा निउट्टिसियाननि बेोसोनजोंसो बानायदों। अदेबानि बे डाइट चार्टआव साइन खालामनाय डक्टरआ एम्सनि डायटिसियान।

इराननि गाग्लोबनायाव इज्राइलआ गोबां ख'हा जानांदों



तेहरान, 22 एप्रिल : इज्राइलआव इरानआ इन आरु मिसाइलजों गाग्लोबनायनि उनाव मोनसे गोदान दान्थे-बिदान्थेनि आयदा सिखादों। इराननि सासे जौसिन दैदेनिगिरिया बे आयदायाव आलादा रोखोमै फिनजाथाइ होदों। इराननि जौसिन दैदेनिगिरिआ इज्राइलआव इन आरु मिसाइलजों गाग्लोबनायाव ख'हा जानायजों लोब्बा थानाय सौथिनि फिननाय होनो नेवसिगासनाया तेहराननि गोखों गाग्लोबनायनि उनावबो माखासेल' मिसाइलफोरा गावनि थांखिसिम सौहैनो हादों होन्नाय बाश्राखौ गनारथिना लाथावनि इसार होयो। इराननि गाग्लोबनायाव इज्राइलआ मख 'जाथाव ख'हा जायाखै होन्नाय बाश्राखौबो रोखायै मिबथिनाया गोनांथार जाना फेदों। इराननि जौसिन दैदेनिगिरि

बिबानगिरिफोरा इज्राइलनि फिनजाथाइ होनायखौ लानानै जेबो रोखोमनि बिबुंथि होयाखैब्लाबो इराननिफ्राय मिसाइल डिफेन्स सिस्टेमखौ बाहायनाय जादोंमोन। बेनि अनगायै हादतनाडै कमाशेंयेल फ्लाइटफोरखौबो होबथानाय जादोंमोन। मख 'जाथावदि, इरानआ इज्राइलनि एयार डिफेन्स सिस्टेमखौ ख'हा खालामनायनि थांखिजों थानाय 13 एप्रिलखालि गोबां अन्जिमायाव इन, बेलिस्टिक आरु कृ ज मिसाइलफोरखौ गावदोंमोन। इज्राइलआव इराननि बे गाग्लोबनायखौ 1991 नि उनाव दासिमनि बयनिखुडो देरसिन नैथि गाग्लोबनाय होन्ना गनायना लानाय जादों। बै समाव इरकनि तानाशाह सद्दाम हुसैनआ लैथोमाबोरि दावहानि समाव इज्राइलनि सायाव स्कट मिसाइलजों गावहरदोंमोन। इज्राइलआ आमेरिका, ब्रिटेन आरु न'सुसे हादत जर्दाननिफ्राय मदत मोननाय एयार डिफेन्स सिस्टेम आरु दावहा नांग्रा उरांफोरनि मदतजों बांसिन मिसाइलफोरखौ सिलिंखार खालामदोंमोन।

कामनेइआ इराननि सान्थि, पुलिस आरु फेर मिलिट्री रेभल्युशुनारि गार्डनि गोखौ थाखोनि बिबानगिरिफोरजों खालामनाय जथुमायाव बुंदोंदि, गुबुन दोलोआ बेसेबां मिसाइल गावहरदों, बेसेबां मिसाइलआ थांखिसिम सौहैदों आरु बेसेबांआ थांखिसिम सौहैनायाव फेलें जादों बेखौ खालामदों। बिथाड बुंदोंदि, गाहाइ आयदाया इराननि माहारियारि थाखोयाव आरु हारिमायारि जौसांआव इरान सान्थ्रिनि गोहोआ मख 'जाथावसिन। बेनो बेवहाय गनायजाथावबो जानानै फेदों। बे समाव इरान सान्थ्रिनि गागि बिबानगिरिफोर इस्फहन सहराव शुक्र बारखालि इज्राइलनि फिनजाथाइ होना गाग्लोबनायखौ लानानै जेबो बिबुंथि होयाखै। अदेबानि

मणिपुरनि मोन 11 भट मिरुफोराव फिन भट सोनाय जादों

इम्पल, 22 एप्रिल : थानाय 19 एप्रिलखालि मणिपुरनि मोन 11 भट मिरुफोराव हिंसायारि जाथायफोरा सोराडव फेनायनि उनाव बिसायख'थि आयगआ बेफोराव फिन बिसायख'थि खुंनगौनि बिथोन होदोंमोन। बिथोन बायदियै दिनै 22 एप्रिलखालि फिन बैफोर भट मिरुफोराव भट सोफिननाय जायो। फारसेथिं मणिपुरनि गुबुन मोन 13 भट मिरुफोराव भट सोनाया नैथि खोलोब एबा 26 एप्रिलखालि जागोन। मख 'जाथावदि, थानाय शुक्र बारखालि लक सभा बिसायख'थि गिबि खोलोबनि भट सोनाय हाबाफारि सोलिबाय थानाय समाव मणिपुरनि माखासे भट मिरुफोराव दुथांफोरा जेना गोनाडै गुलि गावलुंनो दुंहाव थासारि लाबोदोंमोन आरु



इभिएमखौबो सिलिंखार खालामदोंमोन। बेफोर भट मिरुआव दिनै फिन भट सोनाय क तौजामआव थानाय मोनसे मिरुआव भटखौ खुंफिननाय जादों। थानाय एप्रिलखालि जानाय हिंसा नि जाथायफोराव सासे नोगोरारिया जोखोम जानायनि खौरां मोन्दोंमोन आरु इम्पलनि माइरंकम्पु साजेब आरु तंम लि काइ, से डिगिआनि मोनब्रै मिरु आरु इम्पल सान्जा जिल्लानि तंजुआव मोनसे मिरु, उरिपकआव

एलसि गेटआव रवाराइज्ड लामानि राहा खालामनाय

इ-डेन्डर फोसावधाय नं: 36/डिब्ल्यू-2/एप्रिलके, अक्ट: 18-04-2024; गाहायाव होनाय खामानि थाखाय मुंयवनिइला इ-डेन्डरहावहादो, टेहरान नं: 09-एप्रिल-III-2024; खामानि मुं: आलिपुरदुवार जेनर डिपन्तनि आबवायव थायन एलसि गेट नं: एस्के-172, एस्के-162, एस्के-161, एस्के-155, एस्के-134, एस्के-133, एस्के-132, एस्के-127 आरु एस्के-117 आब रवगोनं सामनि राहा खालामनाय। टेहरान बेनिन: 2,05,28,759.92 रुं; अरिमा रं: 2,52,700-रुं; टेहरान बन्द जानयनि अक्ट' आरु सर: 09-05-2024 नि 13:00 सिंयाव आरु वेवेव जगोन 09-05-2024 नि 15:00 सिंयाव। आबुई मिथिनि www.ireps.gov.in वेबसाइटआव नयवो।

डिआएन (बसिलड), आलिपुरदुवार जंशन सा-सान्जा सिमना रेलवे मिथिनुयै गाहकफोरनिफिरम सिथियाय

वोसोरारि सामन्त्याय नायनि थिका

इ-डेन्डर फोसावधाय नं: एस्एडिब्ल्यू/एप्रिलके/01, 02 आरु 03; अक्ट: 16-04-2024। गाहायाव फोसावधाय खामानि थाखाय मुंयवनिइला इ-डेन्डर हावहादो। एस्एन.1. इ-डेन्डर नं: एस्एडिब्ल्यू-01-2024-25; खामानि मुं: आलिपुरदुवार डिपन्तनि बिबि-III कोन्डोयाव डिबि सेरसिनि 3 (थाप) बोसोर समनि थाखाय गुरार वोसोरारि सामन्त्यायनि थिका। फोसावधाय टेहरानि बेनिन: 10,46,235/-रुं; बिड सैकिकरिडि: 20,900/-रुं। एस्एन.2. इ-डेन्डर नं: एस्एडिब्ल्यू-02-2024-25; खामानि मुं: आलिपुरदुवार डिपन्तनि बिबि-IV कोन्डोयाव डिबि सेरसिनि 3 (थाप) बोसोर समनि थाखाय गुरार वोसोरारि सामन्त्यायनि थिका। फोसावधाय टेहरानि बेनिन: 17,93,580/-रुं; बिड सैकिकरिडि: 35,900/-रुं। एस्एन.3. इ-डेन्डर नं: एस्एडिब्ल्यू-03-2024-25; खामानि मुं: आलिपुरदुवार जेनर यार्डआव उना पिड हावहानि राहा खालामनाय (एस्एडिब्ल्यू लोब्बा गोनां खामानि)। फोसावधाय टेहरानि बेनिन: 75,61,355/-रुं; बिड सैकिकरिडि: 1,51,200/-रुं। इ-डेन्डर बन्द जगोन 10-05-2024 अक्ट'नि 15:00 सिंयाव आरु वेवेव जगोन 10-05-2024 अक्ट'य बन्द जानयनि उनाव। गोजीयाव फोसावधाय इ-डेन्डरनि आबुं फोसावधाय आरु टेहरान लाहौरी वेवहाद www.ireps.gov.in वेबसाइटआव मोनो हागोन।

डिआएन (एस्एडिब्ल्यू), आलिपुरदुवार जंशन सा-सान्जा सिमना रेलवे मिथिनुयै गाहकफोरनिफिरम सिथियाय

सुप्रिम कर्टआ 14 बोसोरनि हिन्जावसानो 30 सप्ताहनि गथ 'खौ एभर्शन खालामनो गनायथि होबाय

गोदान दिल्ली, 22 एप्रिल : सुप्रिम कर्टआ समबारखालि मोनसे गिदर थांखि खोनासंहोयो। रेप खालामजानानै गोरबोआव थानाय केसआव हियारि खालामनानै सुप्रिम कर्टआ बुडोदि, 14 बोसोरनि रेपजों भुगिनांनय हिन्जावसाखौ एभर्शन खालामगोन। कर्टआ 14 बोसोर बैसोनि रेपजों भुगिनांनयनो 30 थि सप्ताहयाव एभर्शन खालामनो गनायथि होबाय। बे सरासन्हा खालामनाय केसखौ नोजोर होनानै एभर्शननि गनायथि होनाय जादों। बेनि सिगां सुप्रिम कर्टआ 19 एप्रिलाव 14 बोसोर बैसोनि गोब्राव रेप केसजों भुगिनांनयखौ मेडिकेल नायबिजिनो बिथोन होदोंमोन। भुगिनांनया गावनि 28 सप्ताहनि गोरबोयाव थानायखौ एभर्शन खालामनो दाबि दैखानानै सुप्रिम कर्टआव आर'ज गाबदोंमोन। गाहाइ बिजिरगिरि डिवाइ चन्द्रचुड आरो बिजिरगिरि जेबो पारदीवालिन पिठआ रेपजों भुगिनांनयनि फारसेनिफ्राय इमारजेन्स बिजिरनो दाबि




देखानायखौ लानानै दैथाइ हरनाय मोनसे इ-मेलखौ गोनांथि होनायनि उनाव बे केसखौ इमारजेन्स हियारिनि थाखाय 19 एप्रिलनि बेलासिनि 4:30 रिगायाव ज' जायो। उफ्रा सलिसिटर जेनेरेल एश्वर्या भारतीया बे केसआव सरकार थान्दै जायो। बे केसनि सोमोन्दै बिजिरसालिया मुम्बाइनि सायन देहा फाहामसालिनिफ्राय रिपर्ट बिदोंमोन। हिन्जावसानि बिमानि फारसेनिफ्राय थिसन्याय

आर'जलाइनि सायाव सुप्रिम कर्टआ हियारि खालामो, जेगव बम्बे हाइ कर्टनि बै बिथोनखौ सेलेन्स होदोंमोन, जेराव एभर्शनखौ गनायथि होयाखैमोन। आर'ज लाइ थिसनग्राफोरनि फारसेनिफ्राय बिजिरसालियाव नुजाथिनाय उकिलआ बुंदोंमोनदि, हिन्जावसाया 28 थि सप्ताहनि प्रेगनेन्ट आरो बियो आधिखालाव मुम्बाइयाव दड। सुलुनि बायदिब्ला, एमटिपि नेम-खांथिनि गेजेरजों जुलि

जानाय आइजोफोरजों लोगोसे जर'खा थाखोनि आइजोफोरनि थाखाय एभर्शननि मेक्सिमाम सम सिमनाया 24 सप्ताह।

जमेट'आ प्लेटफर्म फिसखौ 25 जौखोन्दो बांहोबाय

गोदान दिल्ली, 22 एप्रिल : फुड डिलिभरि जमेट'आ कास्टमार एबा बाहायगिरिफोरनि थाखाय 25 जौखोन्दो प्लेटफर्म फिसखौ बांहोबाय। बेनि ऑथिया जादों बाहायगिरिफोरा जाग्रा मुवा अर्डर खालामनायाव मोनसे अर्डरआव 5 रॉनि प्लेटफर्म फिस होनांसिगोन। बेनि सिगां जमेट'आ मोनफ्रोमबो अर्डरआव 4 रॉ फिस लादोंमोन। मख'जाथावदि, थानाय जानुवारी दानाव कम्पनीया प्लेटफर्म फिसखौ 3 रॉनिफ्राय 4 रॉ खालामदोंमोन। बेनिफ्राय आधिखालाव 1 रॉ बारायनानै 5 रॉ खालामना होयो। अदेबानि कम्पनीया माखासे सहरफोरवल' प्लेटफर्म फिसखौ



बांहोदों। बेनि गेजेरव दिल्ली-एनसिआर, बेंगलुरु, मुम्बाइ, हाइड्राबाद आरो लखनौ बायदि सहरफोरा दंफायो। रिपर्टनि बायदिब्ला कम्पनीया सानसेयाव 20 लाखनिफ्राय 22 लाखसिमनि अर्डरखौ डिलिभरि खालामो। बेबायदियाव 1 रॉ फिस बांहोनायनि थोंजों गोहोमखौ

कम्पनीनि मुलाफ्फायाव बांबोनाय थाखायाव नुनो मोनगोन। जमेट'आ 2023 नि आगस्ट दाननिफ्राय प्लेटफर्म फिसखौ लानो जागायदोंमोन। बे समाव कम्पनीया मोनफ्रोम अर्डरआव 2 रॉ सार्च लादोंमोन। बेनिफ्राय बे बोसोरनिनो अक्टबर दानाव बेखौ 3 रॉ खालामो आरो जानुवारी 2024

मणिपुरनि उनाव अरुणाचल प्रदेशनि मोन 8 मासिफोराव फिन बिसायख'थि जाफिनगोन

इटानगर, 22 एप्रिल: भारतनि बिसायख'थि आयगा मणिपुरनि उनाव अरुणाचल प्रदेशआव फिन बिसायख'थि खुंफिनो थिरांथा लाबाय। अरुणाचल प्रदेशनि मोन 8 भट मिरुफोराव फिन भट होनाय जागोन। 19 एप्रिलखालि अरुणाचल प्रदेशआव गिबि खुन्दोनि बिसायख'थियाव गोबां भट मिरुफोराव हिंसायारि जाथाय जादोंमोन। बेनि उनाव बिसायख'थि आयगा बेफोर मिरुफोराव फिन भट होनाय हाबाफारि खुंनो थिरांथा लादों। 19 एप्रिलाव जानाय भट होनाय नंगुबै जानाय नडा लकसभा बिसायख'थिजों लोगोसे गासै राइज्योआव 19 एप्रिलाव अरुणाचल प्रदेशआव बिसायख'थि जादोंमोन। बिसायख'थि आयगनि सासे मावख'गिरिया बुंदोंदि, अरुणाचल प्रदेशआव बिधानसभा बिसायख'थिनि समाव हिंसायारि जाथाय आरो इभिएम खहा जानायनि खौरां मोन्दों। बिसायख'थि आयगआ मोन 8 भट मिरुफोराव 19 एप्रिलनि बिसायख'थिखौ नंखाय होना



फोसावदों आरो फिन भट होनायनि थाखाय 24 एप्रिलनि अक्ट' थि खालामदों। लेडइ गाहाइ बिसायख'थि मावख'गिरि लिचेन कयुआ बुंदोंदि, राइज्योनि मोन 8 भट मिरुफोराव फुंनि 6 रिंगानिफ्राय बेलासिनि 1 रिंगसिम भट होनाय जागोन। बिसायख'थि आयगा सानजा कामेंग जिल्लानि बामेंग बिधान सभा बियाबनि सारिय, कुरं कुमेनि न्नापिन

बिधान सभा मासिनि लटें लथ, गोजो सुबनसिरि जिल्लानि नाचो बियाबनि डिन्सर, बगिया सियुम, जिमबारी आरो लेंगि आरो सियांग जिल्लानि रमंगं बिधान सभा बियाबनि बगने आरो म'लमआव फिन भट होनाय थिरांथा लादों। अरुणाचल प्रदेशआव 50 एमएलएफोरखौ सायख'नो थाखाय 19 एप्रिलाव बिसायख'थि

जादोंमोन। बेवहाय भट होनायनि जौखोन्दोआ 76.44 मोन। राइज्योआव 60 आयेन आफादनि मासिफोर दंनाथय बिजाथिफोरा उदां महरै 10 मासि देरहादों। मणिपुराव थानाय बोसोरसेआव गोबां हिंसायारि जाथाय जादों। बेवहाय मोनै हरिनि गेजेराव दाडबाजिआ सोलगासिनो दं, जायनि जाहोनाव गोबां सुबुंफोरा जिड खोमानांवाय

आमेरिकानि हादतगिरि ज' बाइडेनआ महाबिर जयन्तिनि गाहाम हामब्लाइथि होदों

वाशिंग्टन, 22 एप्रिल : आमेरिकानि हादतगिरि ज' बाइडेनआ महाबिर जयन्तिनि खाबुआव जैन धोरोमारिफोरनो गाहाम हामब्लाइथि हरदों। महाबिर जयन्तिनि खाबु हामब्लाइथि होनाय बाइडेनआ आमेरिकानि गिबिसिनि हादतगिरि जानानै फेदों। बिथाड सशेल मिडिया प्लेटफर्म एक्सआव मोनसे पस्ट होनानै बुंदोंदि, आं आरो जिलआ जैन धोरोमनि सुबुंफोरनो महाबिर जयन्तिनि गाहाम हामब्लाइथि होयो। फे जों बयबो दिने महाबिर स्वामीनि फोरों थाइफोरखौ आजावनानै अन्नाय, रंजनाय आरो गोजोन गोसारहोनानै बे रंजाथाइखौ फालिनि। प्रख्यात जैन फोलेरनि दैदेनगिरि आरो एशियान-आमेरिकानि आरु गाहायै हवाइयान/प्रशान्त द्विप हान्जानि कमिशनआव हादतगिरिनि बोसोनिगिरि अजय भुटरियाआ बाइडेननि खौरां हसनायखौ गोसो गुडुडे बरायदों।



आमेरिकानि हादतगिरि ज' बाइडेन आरु पास्टलेडि जिल बाइडेनआ समबारव महाबिर जयन्तिनि जैन धोरोमारिफोरनो गाहाम हामब्लाइथि हरो। देग्लाय महाबिर जयन्तिया 21 एप्रिलआव गोसैदों। महाबिर जयन्तिखौ जैन धोरोमनि गायसनगिरि महाबिरनि जोनोम सानाव फालिनाय जायो। महाबिरआ जेन

धोरोमनि 24 थि धोरोमारि फोसावदिगिरि एबा गुरुमोन, जाय गावनि बोसोनिनि गेजेरजों शान्ति आरु दिदोंमै गोसारहोदों। महाबिर जयन्तिआव जैन मन्दिरफोराव आर'ज गाबनाय जायो, भगवान महाबिरखौ सिबिनानै आर'ज मेथाइ खनो, देहा आरु आत्माखौ निस्थार खालामनायनि थाखाय उपवास थानाय, हान्जा सुरनाय बायदि हाबाफारि खुंनय जायो।

पाकिस्ताननि संसददाव जुता खावनाय जाथाइ नुजाथिदों

इस्लामाबाद, 22 एप्रिल : पाकिस्तानआ आधिखालाव निखाउरि थाखोयाव सौहोबाय। बेयाव आटा बायदि गाहाइ गोनांथि जानाय बेसादफोरनि थाखाय सुबुंफोरा भुगिनांनयनो दड। बे हादतया आरु बायदि निखाउरि जाबायदि, सिखावफोरबो जुता खावनाबो गोनां जानानै फे बाय। बेबो सरासन्हा



जायगायाव नडा, बबेखानि पाकिस्ताननि संसदआवनो जुता खावदों जेराव पाकिस्ताननि दैदेनगिरि, एमपि आरु खौरंगिरिफोर जुता खावनाय नुनो मोनानै। बे सिखाव खावनायनि उनाव स्पीकारआ बे केसाव आखाय होनाडो। दा एक्सप्रेस टिब्युनि रिपर्टनि बायदिब्ला, पाकिस्तान संसदआव मोनसे सरासन्हा नडै जाथाय जादों। मानोना सिखावआ रैखाथिखौ बारनायाव जाफुंसारनो हादों। बे जाथायनि उनाव बेयाव थानाय बिबानगिरि आरु खौरंगिरिफोरा गोमोयो, जेब्ला बिसोर आधि लांदाडै न'आव थानो गोनां जाना फेयो। पाकिस्ताननि संसद लांगोनानिफ्राय जुताफोर रहिय्य गोनाडै गोमानायजों रैखाथि मावसुमाफोरा गोमोनादों। बे

जाथाया संसद भवननि सिडव थानाय गंसे मसजिदआव शुकुराखालि नमाजनि समाव नुजाथिदों, जेराव नेशनेल एसेम्ब्लि (एमएनए) नि सोद्रोमा, खौरंगिरि आरु संसदीय मावसुमाफोरजों लोगोसे सिबियारिफोरा ज' जादोंमोन।

आमेरिकानि मदद फोसावनायाव रासियाआ इउक्रेनखौ फोजोबरांनो सांग्रांथि होदों

कीयेभ, 22 एप्रिल: रासिया आरु इउक्रेनि गेजेरव दावहाया सोलगासिनो। दावहाया जागायजे न्नायनिफ्राय 2 बोसोरनिबो बावसिन जाबाय। अब्लाबो दावहाया जेबनायनि फासै फेयाखै। आधिखालाव मोनसे जिंगानि बाध्रा सिखादोंदि, रासियाआ फिन खेबसेबाव रागा जोंखादों। इउक्रेन आरु सोनाबयारि हादरफोरनि दैदेनगिरिफोरा आमेरिकानि संसदनि थान्दै आफादनिफ्राय पास खालामनाय मददनि पेकेजखौ बाखायनायनि थाखाय रासियाआ रगा जोंखादों। बेखौ लानानै बियो सांग्रांथिबो होनानै बुडोदि, बिलआ पास जानायनि उनाव इउक्रेनआ आरुबाव सिलिंखार जागोन आरु बांसिन सुबुं थैगोन।



मख'जाथावदि, बावैसो सिगां आमेरिकान संसदनि थान्दै आफादआ जर'खा जथुम्मानि समाव आमेरिकानि लोगो हादर इउक्रेन, इजयइलजों लोगोसे गुबुन हादरनि थाखाय जय 95 आरख आमेरिकान डलारनि मददखौ गनायथि होदोंमोन। इउक्रेनि हादरगिरि भलदिमिर जेलेंस्कीआ बे थांखिखौ लानायनि थाखाय आमेरिकान एमपिफोरनो साबायख'रबो

होयो। बेनि सिगां बिथाड आमेरिकानि मददनि अनगायै इउक्रेनआ दावहायाव जेनगोन होनानै बुंदोंमोन। ससेल मिडिया प्लेटफर्म एक्सआव जेलेंस्कीआ पस्ट होनानै बुंदों, जों जौनि हादर, बेनि उदांसि आरु सुबुंफोरा मोन्नाय फाफोरमोबोनि मददखौ लानानै बाखायो, जायखौ रासियाआ बायखोन्दा दावहानि गिबि साननिफ्रायनो गावनि

दैज्लां आरु गोजां बोथोराव पेट्रलिं खालामनाय

इ-टेन्डर फोसावनाय नं: 37/डिजिटल-2/एप्रिल/2024; अक्ट: 18-04-2024। गाहाय फोसावनाय खालामनि थाखाय मुम्बैगिरिआ इ-टेन्डर होजायहोदों। टेन्डर नं: 19-एपि-1-2024। खालामनि सु: एप्रिल एन कंक्ट्रक्टर-11 नि बेखोवाव 12 दान समनि थाखाय दिनां आरु गोजां बोथोराव पेट्रलिं खामनि। टेन्डरनि बेसेन: 67,55,861.72 रु; अंतिम नं: 1,35,100.00 रु; इ-टेन्डर बन्द जानानि अक्ट' आरु रम: 13-05-2024 अक्ट'नि 13:00 रिगा रेरो बेखोवगोन 13-05-2024 अक्ट'नि 15:00 रिगा। गोजांवाव फोसावनाय इ-टेन्डरनि टेन्डर लाजों लोगोसे आबु फोसावनायि www.ireps.gov.in वेबसाइटआव मोनो हगोन।

सा-सानजा सिमना रेलव

"मिन्टुवै ग्राहकफेदनिमि सिबिथार"

आलिपुरदुवार जंथन डिभिजननि गुबुन गुबुन स्टेसनफोराव पार्किनि थिका

आलिपुरदुवार जंथन डिभिजननि गुबुन स्टेसनफोराव पार्किनि थिका नि किरा नि 23। ए अन्सन जावबेनोमो (गोबो न थिको): 02-05-2024 अक्ट'नि 13:30 रिगाव। केंद्रा रि: पार्कि-साखा खक, सुबाना, बरबे आरु खकुरि बालिन सखाने गोनां। 12 इन्डि: बोसोरनि सारिनिमि थिस: सान: 1095।

फरि नं.	ल'ट'नं.	बन्दनि अक्ट' आरु सम
ए/1	पार्कि-एप्रिल-एप्रिल-डिजिटल-21-23-2	02-05-20 अक्ट'नि 14:00 रिगा
ए/2	पार्कि-एप्रिल-एनअकिउ-डिजिटल-6-23-1	02-05-24 अक्ट'नि 14:10 रिगा
ए/3	पार्कि-एप्रिल-डिप्लुसएडस-एमएक्स-24-24-1	02-05-24 अक्ट'नि 14:20 रिगा
ए/4	पार्कि-एप्रिल-विएक्सटि-एमएक्स-15-23-1	02-05-24 अक्ट'नि 14:30 रिगा
ए/5	पार्कि-एप्रिल-एप्रिल-एमएक्स-22-23-4	02-05-24 अक्ट'नि 14:40 रिगा
ए/6	पार्कि-एप्रिल-केएएमजि-एमएक्स-12-23-1	02-05-24 अक्ट'नि 14:50 रिगा
ए/7	पार्कि-एप्रिल-सिअवि-एमएक्स-16-23-2	02-05-24 अक्ट'नि 15:00 रिगा
ए/8	पार्कि-एप्रिल-एफकेएम-एमएक्स-30-23-1	02-05-24 अक्ट'नि 15:10 रिगा
ए/9	पार्कि-एप्रिल-एप्रिल-एमएक्स-1-23-2	02-05-24 अक्ट'नि 15:20 रिगा
ए/10	पार्कि-एप्रिल-सिबिडि-एमएक्स-36-23-1	02-05-24 अक्ट'नि 15:50 रिगा
ए/11	पार्कि-एप्रिल-एमएक्सवि-एमएक्स-37-23-1	02-05-24 अक्ट'नि 16:00 रिगा
ए/12	पार्कि-एप्रिल-डिप्लुस-एमएक्स-18-23-2	02-05-24 अक्ट'नि 16:10 रिगा
ए/13	पार्कि-एप्रिल-विएनि-एमएक्स-38-23-1	02-05-24 अक्ट'नि 16:20 रिगा

मिनि कुरिं अरु सग 30 मिनिट। मोसोनि उनाव मोसोसे ल'ट'जोवनायनि इन्फोमआ 10 मिनिट। नेजेर हरो मोन: बांसि मिनिनो साबाय थिकोफोखौ इ-अन्सननि लिमिं मडिबलाखौ आइआयगिरि वेबसाइट www.ireps.gov.in आब नयनो खालामनाय।

डिआरएम(सि), आलिपुरदुवार जंथन सा-सानजा सिमना रेलव

"मिन्टुवै ग्राहकफेदनिमि सिबिथार"



आरु सोलोखांथियारि सोमोन्दोआ मख'जाथाव। जेनेरेल चौहाननि फ्रान्स

दावबायनाया सोनाब एसियाआव जेना बांनयनि गेजेरजों जादों। रैखाथि

बिफानआ सिडिएसनि दावबायनाय समखौ मख'आ जासे बुडोदि, बे दावबायनायनि थांखिया दरने हादतफोरनि गेजेराव रैखाथि सोमोन्दोखौ गोखोंसिन खालामनाय। जेनेरेल चौहानआ दावबायनाय समाव फ्रान्सनि अखामा कामान आरु लेन्ड फर्सेज कामान्ड दावबायनाय आरु इकले मिलितेर (मिलिट्रि स्कुल) याव सांथि आरु जुथाइ स्टाफ फर्सनि ट्रेनिं होग्रा बिबानगिरिफोरजों सोमोन्दो लाखिनायनिबो हाबाफारि दड। सिडिएसआ न्युवे-चेपल मेमरियेल आरु विलर्स-गुइसलेनयाव थानाय भारतयारि गोसोखां खाम्फायावबो थंगोन आरु बेयाव बै भारतआरि जोहोलाव सांथिफोरखौ मान बावनानै बिबार बावगोन, जायफोर सेथि मुलुग दावहानि समाव गावसोरनि जिउखौ बावदोंमोन।

मुलुगनि बबे जिबआ दै लोड लासे थाना थानो हायो ?

आथिखालनि सशेल मिडिया मुगायाव गोबां रोखोमनि अटिकेल इलुजन सावगारिफोरजों लोगोसे बायदि जेंना गोनं सोंथि सोंनायखौबो गोबां नुनो मोनसै । बेफोरनि फिन्नायखौ नागिरबायनाने गोबां सुबुंफोरानो गोसोनि जेंनायावबो गोलैयो । बेबायदिनो दिने मोनसे सोंथि लानाने फैदों । जाय सोंथिखौ नोंथाड माब्लाबाबो



खोनाफेरखै जानो हागौ । बे सोंथियानो जादों मुलुगाव थानाय बबे जुनातआ दै लोडोब्लानो जिउ गोमायो ? मुलुगनाडै नोजोर होयोब्ला गोबां जिब-जुनातफोरखौ नुनो मोनो । बेफोरनि गेजेराव खावसेखौ जों मिबथिनो मोन्दोंब्लाबो गोबांखौनो मिबथिनो हानाय जाया । बेफोरनि बागै जों खोनाफेरखैबो जानो हागौ । माब्लाबा बेनि बागै



खोनादोंब्लाबो एबा बबेबा बिजाबफोराव फरायनो मोन्दोंब्लाबो बेखौ गोसोआव थायाखै जानो हागौ । बिब्दियाव मोनसे सोंथिया बेबोदि, बुहुमाव माबेबा जुनातआ जिउआव दै लोड लासे थानाने थानो हागौ नामा ? सोमोनांथाव बाश्रादि, जोंनि नखरफोरावबो नुनो मोन्नाय एन्जरफोरनि मोनसे जोलैयो दै लोड लासे थानो हायो । बे जोलैनि एन्जरफोर जिउआव खेबसेबो दै लोड । मानोना



दै लोडोब्ला बेफोरो थैलानो हागौ । जों सुबुंफोरजों लोगोसे गोबां जिउनांफोरानो दै लोड लासे थानाने थानायनि बाश्राखौ सानखानो हाया । नाथाय कंगारु मुनि एन्जरआ जिउआव खेबसेबो दै लोड लासेबो थाना थायो । बे फोलेरनि एन्जरफोरखौ सा आमेरिकानि बालाहामा ओन्सोलाव मोन्नाय जायो । कंगारु एन्जरफोरा बालाबारियाव थायो आरो अब्लाबो बेफोरो दै लोड । नाथाय बिनि देहायाव दैनि आंखालबो नुजाथिया । उत्थायै बिसोरनि देहायाव



गोबां बिबानि दै मोन्नाय जायो, जायनि जाहोनाव गुबुन जुनातआ बेखौ बुथारनाने आदार हिसाबै जायो आरो गावनि दै गांनायखौ फोलोमो । कंगारु एन्जरफोरनि सिगांनि आथिड गुसु, खर'आ गिदिर आरो मेगनआ फिसा फिसा जायो । बेनि देहायारि दाथाया ओरैबायदिदि, बेफोरो गावसोरनि देहायाव दैनि गोनांथिखौ



मोन्दांथिया । बिगियानगिरिफोरनि मोनसे हान्जाया बे एन्जरनि सायाव नायबिजिरनाने मिबथिनो मोन्दोंदि, बे जोलैनि एन्जरफोरा आदार जानायाव मोन्नाय मेटबलाइस दैजोंनो थानाने थानो हायो ।

मिथिंगा

बे बहुम बिखायाव

गोजौ गाहाय हायेन,

मिथिंगा बिखायाव

जैरैबो सोरगिदि बेंखननाय ।

नायोब्ला बेसे समायना

बे मिथिंगाया,

जैरैबो दैमा, दैसा,

जिरि जिरि बोहैबोनाय ।

बिफां लाइफांआव बाना

दाउसिन दाउलाया मेथाय रोजाबसै

गोसोनि हाबिलाया रिंखांफैसै

अरायबो दाउसिन दाउलानि मेथाय खननाया ।

बे बहुम मिथिंगायावनो,

गोसो खुसियै, गथ-गथाया रंजाबावदों

लावखार गथफ्रा मैसोनि बिखुआव

गाखोना सिफु सुनाने मिथिंगा बिखायाव रिसारहोदों ।

नाथाय अरायबो गोजोनै मानसि माहारिआ

बे मिथिंगायाव आलो गोजोनै रायजो जादों

अरायबो गोसोनि हाबिलाया बेरखांफैदों

नाथाय गोजोन खौसेयै थालायदों ।

बेरे सिखिरिया, बिबाराव बिदै सोबदों,

नाथाय बिसोरनि गोमो गोथां

गाबा मिथिंगायाव समायफलेदों

नाथाय जैरैबो बिफां लाइफां, हाजो-हायेनजों

बे मिथिंगा बिखाया समायफलेनाय ।

मुस्रि असिन्त बसुमतारी

गामि- खासापुर हालां बाजार ।

खौसेनि आगान

मुस्रि रमेश चन्द्र ब्रह्म

खोमसि मुलुगआ सोरां जाबोगौ हनै

अखानायसि सोरांनि बारा बारबोगौ,

माबा रादाब लानाने फैगौ जोंनि फासैं

फुंबिलिनि गोजोन बारआ ।

खोमसिनि सिगां सोरांनि लामाजों

आवगायबो बयबो हारिनि सुबुं

दागि-दागि रावबो रावखौबो दागि

दानि मुगायाव गिनाने थानायनि सम गैलिया ।

समा सौबाय बोथोरा सौफैबाय बयबो सुबुंआ

हारिमा-हारिसा फोलेर दानायनि फारि जाबाय ।

जान्जि खाफ्रा, बिखा फोर्दान, सुथुरा फैगौ हनै

जोंनि मोखां फासैं हान्जा-हान्जा ।

हारि-माहारि बयबो सुबुंआ

खौसे जानाने सुथुरनि सिगां

आवगायबो आखाइयाव हाथियार दैना ।

खौसेनि आगानखौ खोमोरना

साफा-फारफा आगान सुराब्ला

नुजागोन हारियाव अलखद समा ।

हिंसानि लामाखौ नागारनाने

अहिंसा लामाखौ लायाब्ला

जानोसै हनै हारिया फोरसा-फोरसि ।

खौसेनि आगानखौ सुराब्ला

जोबसां बोगौ हनै जोंनि हारिया

सुथुरनि आखाइयाव फारि-फारि ।

हिंसानाय गोसोखौ नागारना

अहिंसा गोसोखौ बोजबना

माबारै सुथुरनि सिगां फासैं

आवगायनि फै जों बयबो बर' हारि

खौसेनि आगान होदिनि मुलुगाव अराय ।

रंजालि गथ'फोरनि सौरा

नों जेब्ला फैगोन

जेब्ला नों आनि जिवाव फैगोन

अब्ला आनि लांदाडैथानाय फैसालिया आबुं जागोन,

जेब्ला नों आनि फारसे नायहरगोन

अब्ला आनि मोखाडव मिनिस्तुनायखौबो नुगोन ।

दं नेनाने मोजोमसे गोरबोआ नोंखौनो

दं नेनाने मोननो नोंनि फंसे अननायनि रावखौनो,

दं नेनाने नोंखौ लांगोनानि आवजार बिफां सिडवनो

दं नेनाने गोसोआ नोंखौ फैफिनगोन साननानेनो ।

आदि नडमोन सागलोबनाय गोसोम दाखा जोमै बादि

आदि नडमोन बुहुमखौनो सोमावलुंग्रा बांघि बादि,

आदि नडमोन बाद दाननि सारअन्थाइ अखा बादि

आदि नडमोन अखाजों सोमजिनाय दैबाना बादि ।

दंमोन गोरबोआव नोंनि थाखाय दखरसे जायगायाबो

दंमोन आनि देरायाव नोंनि थाखाय दखरसे

थावनियाबो,

दंमोन आनि बागानाव नोंनि थाखाय बारनाने गलाबाबो

दंमोन आनि अखाडव नोंनि थाखाय गावदां

अखाफोराबो

जेब्ला नों आनि जिवाव फैफिनगोन

अब्ला गोरबोनि बाश्राफोरखौ बेखेवनाने होगोन,

जेब्ला नों नोंनि लामायाव हानथिबाय थागोन

अब्ला सानसेब्लाबो नों आंखौ गोसोखांगोन ।

जेब्ला नों गावदां अखाफोरखौ लाना सिमां सुजुगोन

अब्ला नोंनि फैसालियाव आनि जारां महारानो नुजागोन,

जेब्ला नों हारसिडैजिरायनाने सानहाबबायगोन

अब्ला आनि गासै बाश्राफोरखौ रोमै रोमै जाखांफैगोन ।

जेब्ला नों सानसे दुखुआव गोलैगोन

अब्ला आनि मुडनो नोंनि गुस्थियाव रिंखांगोन,

जेब्ला सानसे नोंनि लोगोफोरा नोंखौ एदावगोन

अब्ला सिरि सिरि गावखौनो लाजिनाय मोनगोन ।

जेब्ला नों आनि जिवाव फैफिनगोन

अब्ला आनि गासै सिमांफोरा जाफुंगोन,

थारैनो, नों आनि जिवाव फैफिनगोनना.... ?

थारैनो, नों आनि जिउनि लोगोरि जागोनना... ?

जोंसार बसुमतारी

6 नं सान्तिपुर, गहपुर

फैमाल जिउ

आनि जिउनि मोजां मोन्नाया

दिने फैमाल जिउ खालामलांबाय,

गोबों गोसोआव दुखु-दाहा

सहायस हायै हांमा गालांबाय ।

सानाखै आं अनजालि

गोबों गोसोआव हांमा थागोन,

पुस दाननि फ्रि-फ्रि खुवाजों

मिथिंगानि बिफां-लाइफानि

बिलाइआ रानलांनय बादि,

दिने आनि गोसोआबो अनजालि ।

आनि नोंखौ मोजां मोन्नाया

अराय रानस्राव-खुस्राव फैमाल जिउ ।

फानफेवाली दावआ गावनि अनजालि

लोगोरि गोमाना फिउआ-फिउ

खाराव-माराव गाबनाय बादि ।

आनि नोंखौ अराय हास्थायनाया

बबेनिफ्रायबा बार मोदाय फैना

आनि जिउनि लामा ससेयाव

आनि मेगननि नोजोराव हाड्रि-बाला

सारफावना गालांबाय नों अनजालि ।

आनि नोंखौ मोजां मोन्नाया

आनि नोंनो अननाय होनाया

अरायनि थाखाय थोयै-तोमै,

अराय आनि मेगननि आन्दोआव

आनत्राय लांबाय नों अनजालि ।

गोसो गोबोंआव नोंनि मुंखौ

अराय फैमाल जिउनि सानना

थपला जुना दोनबाय आं अनजालि

बे आनि फैमाल जिउआव ।

स्रि दानसोरां बसुमतारी

थाखो: बि.ए. सेथि बोसोर

गामि सेसायानी

ला:सो: मागुरमारी

जिल्ला-कक्राझार, बितिस् (आसाम)

मोगथानि अनजालि

सोर ? नों मोगथानि अनजालि

आखला नोंनि अनसुलि

रायदावबो हायासै आं बै सानखालि

सानसेब्लाबो रायज्जायगोन नोंजों आजोलि

जाखागोन नोंजोंनो गोथार जुलि ।

मिनिनाया नोंनि मनिसा कइरालानिबादि

मेगन मेहेरनाया नोंनि प्रीति जिनटानिबादि

सिगांथि नायब्ला माधुरी देखितबादि

उरन्थि नायब्ला साडा कापुरबादि

राव नोंनि मैना गाराबादि

खालामदोना ? आंखौ नोंनि आंगोबादि ।

बड'बर'

सेरफांगुरि, कक्राझार

आगदारि गैया

जिउ गोरबोनि मिर्जिनायाव

जिउ गोरबोनि सानस्त्रिनायाव

बिलि लानाने नुयो

आगदारि गैया

-रैदोम बर', बावसा

थुनलाइनि फिथिखा

गुसु फिथिखाखौ मोनलोंबायब्ला

नोंनि गोबों बिखानिफ्राय...

बावनो आं बोरेथो,

हाखानायथ' नड बावनो ।

आदि अराय गोजोमनोसो लुबैयो

उफले-उफले नोंनि गुवार गोबोंआवनो,

नोंनिनो अननायखौ मोनफुंनो

आनि हाबिलास जायो ।

दं नोंनि राइजोआवनो मानोना

बयनिखुइबो गोदैसिन फिथाया,

जेराव आनि गोसोआ हांखुर जायो

बै अमवृत्ति बिदैखौ सोबनो ।

नाथाय...खायसे सुबुंफ्रा आंखौ

बजबनो थानायाव नोंनि अननायखौ

जावलिआसो होन्नाने बुंसै,

मानोना बिसोर.....

नोंनि फिथिखाखौ मोनलोंफेराखै ।

नोंबो मोनलोंफेरनाय मोनब्ला

मिथिगौमोन नोंबो अब्ला...

बै फिथिखानि बिदैखौ

बेसेदि गोथाव आरो बेसेदि गोदै ।

दा आं नोंनि गोबोंआवनो थानाने

संसारनि गेना खास्थिफोरखौ

नोंनि गोबोंनिफ्राय बोहैबोनाय

गुसु दैमुनि दैजों सुप्राणो लुबैयो ।

नाथाय ...आंबादि

नंखाय बावदा खन्थायगिरिया

आनि आखायनि नंखाय रेबगना

नोंनि गुवार लैथोयाव गास'नो हाया,

अब्लाबो लुबैयो सानसिनो, नोंनि गोबोंआव ।

दंब्लाबो जेन्नाय आरो देरहानाय

थेवब्लाबो लुबैयो हानथिनो मानोथाय,

आखायनि रेबगनखौ लोगोआव लानाय

नोंनि बै फैलाव बिखायावनो ।

सुबास बसुमतारी

कसुगाव (थाप्लाज 'रा)

सोलोंथाय

सोलोंथाया मा ?

सोलोंथाया जोंनि जिउनि लोगो

जोंनि बिफा ।

सोलोंथाय नडब्ला

बे मुलुगआव थाना थानो

दासान सुबुंफोर ।

साननो रोडब्ला गावजों-गाव

नांलाय-लायगोन खमलाय-लायगोन

सोलोंथाय नडब्ला,

गावनि खाफालनि थैखौ

जेरावबो मिथि होनो नाजा

गाव रोंब्ला मालायखौ

फोरोंनो हायो ।

बड'लेन्ड मुलुग सोलॉसालिआव गुरुदेब कालिचरण ब्रह्मनि 165 थि जोनोम सान फालिदों

कक्राझार 22 एप्रिल: बड'लेन्ड मुलुग सोलॉसालिनि लांगोनायाव रंसारिगुदेब कालिचरण ब्रह्मनि 165 थि जोनोम सान फालियो। बड'लेन्ड मुलुगसोलॉसालिनि रेंजिस्टर उ सुबु बसुमतारिआ कालिचरण ब्रह्मनि मुसुखायाव बिबार बाउजेनानै हाबाफारिखौ बेखेवनानै होयो। बे हाबाफारियाव बड'लेन्ड मुलुगसोलॉसालिनि फोरेंगिरि-मावख'गिरिफोरजों लोगोसे फरायसाफोरखो बाहागो लादोंमोन। लोगोसे बे जोनोम सान फालिथायाव जिक्केबि ट्रस्टनि सोद्रोमाफोरखौबो हांखायहस्ताय जादोंमोन। हाबाफारिखौ बेखेवनानै उनाव रेंजिस्टर उ सुबु



बसुमतारिआ बुझेदि, जिक्केबिआ बर' समाजाव समाज फोसाबनायनि गाहाय बुमिनसारिगिरिमोन, जाय गोबां समाजारि-हस्मिआरिबिथिफोरख

गोबां सोलायनाय लाबोदों आरो बर' समाजनि जौगानायनि फासैं बिथानि बिहोमाया जोबोद गिदिर, जायनि थाखाय जों बिथानि मावनायफोरखौ जोबोद

गोसोखाडो। मुलुगसोलॉसालिनि फरायसा अनसाइ बिथोनगिरिनि मावख'निफ्राय साबायख'र बाउनायजों बे हाबाफारियै शुंफैयो।

सालबारियाव एनडिनि बिजाथि जयन्त बसुमतारिआ बिसायख'थि फोसावदिंदों ड० हिमन्त बिश्व शर्मा बायदि गिबि मन्थिखौ आरोबाव 10 बोसोरनि थाखाय नांभावगौ: जयन्त बसुमतारि

सालबारि, 22 एप्रिल: गिबि खोलोबनि बिसायख'थि जोबनायनि उनाव नैथि खोलोबनि बिसायख'थिनि थाखाय खुंथाय गोहोयाव थानाय आरो बेरेखा दोलोयाव थानाय राजखान्थि दोलोफोर जान्नि खप्रानायखौ नुनो मोन्दों। हादतनि गुबुन गुबुन ओन्सोलफोरजों लोगोसेनो कक्राझार लकसभा बियाबखौ लानानै खुंथाय गोहोयाव थानाय इउपिपिएल दोलोआ साखा-फारा जानायखौ नुनो मोनो। कक्राझार बियाबनि इउपिपिएल एबा एनडिनि बिजाथि

जयन्त बसुमतारिआ जिरयनाय-मंनय गैयालासेनो लान्थियै बिसायख'थि फोसावदिंदानाय हाबाफारियाव बाहागो लानायखौ नुनो मोन्दों। रबिबाराव संसदयारि बियाबनि बेंखनाव थानाय मानास बिधान सभा बियाब एबा बावसा सालबारि बियाबनि बारेडबारि, सान्ति बाजार, पातला बायदि ओन्सोलफोराव बिसायख'थि फोसावदिंदानै हाग्रामा महिलारी आरो नव खुमार शरनियाखौ गोखों रवजों सांखारिनायखौ नुनो मोन्दों। बिसायख'थिनि उनाव बिपिएफ दोलोखौ हमथानानै लाखिनो हानाय नंला। हाग्रामा महिलारीआ दोलोनि दैदेनगिरि

सिनायथि होनानै बिजाथिलाइ गथायनाया गथ' गोलैफोरनि खेला गेलेनाय बायदिसो जादों होना फोरमायो। हिरि शरनियानि भट बेकआ दिनेनि दिनाव गैला होना बिजाथिआ रोखा फोरमायो। बिजाथिया जाय हाराव बिटिसिआव एबा आसामआव जौगालु हाबाफोर जगासिनो दं बेबिथिखव नोजोर होयोब्ला जोंनो हिमन्त बिश्व शर्मा बायदि गिबि मन्थिखौ आरोबाव 10 बोसोरनि थाखाय नांभावगौ होना रोखा फोरमायथियो। बेनिखायनो गिबि मन्थिनि आखाइ मुथिखौ गौ हो - गौ र। खालामथारनांगोन। प्रमद बर' आदिने बिटिसिनि गाहाइ मावफु' सोद्रोमा बिथानि दैदेननायवनो ओन्सोलयाव जोजोना गायसनजादों। थानाय सरकारनि समाव बे ओन्सोलयाव फोथायथि आरो रवनिबो सायाव लामा नायनो हायामोन। दिने बे थासाखिखौ मोनफिनबाय। बेवहाय जिउनि

रैखाथि आरो सम्पतिनि रैखाथिबो जाबाय आरो माहारि गुबुन गुबुन धोरोरमारिफोरनि गेजेराव गोजोन आरो खौसेथि जौगालानो थाखाय प्रमद बर'नो गोहो जथायनानै होनांगोन। एनडि हिसाबै बिजेपि आरो इउपिपिएलआ खामानि मावगासिनो दड। खौसेथियै बे ओन्सोलनि जौगाखानायनि बाश्रा सानानांगोन। बे बायदिनो इउपिपिएलनि बिजाथि जयन्त बसुमतारिआ रइजोफोरनि गेजेराव बेरेखा दोलोनि दैदेनगिरिफोरखौ सांखारिनायने बिजेपि एबा एडिनि सरकारि खाबुफोरनि सोमोन्दै गुवारै फोरमायनायखौ नुनो मोन्दों। बे हाबाफारियाव बिजाथि जयन्त बसुमतारिजों लोगोसे भवानिपुरनि एमएलए पनिधर तालुकदार, एमएसएलए जय मुसाहारि, बिजेपि दोलोनि मानास बियाबनि बिबाजगिरि धिराज देउरि, टिसिएलसिसिनि मासिगिरि बिनद मुसाहारिजों लोगोसे गोबां बिजेपि, अगप आरो इउपिपिएलनि दैदेनगिरिफोरखो बाहागो लानो हानायखौ नुनो मोन्दों।

बारग' सोमावसारगिरि दिन'नाथ तालुकदारआ रुंसारि जाबाय

भवानिपुर, 22 एप्रिल: भवानिपुरनि साखाथि कलबारि गामिनि थागिबि सरुपेटा गोजौ फरायसालिनि आजिरि मोन्याय गाहाइ फोरेंगिरि एबा आसामनि थामोनाथा सोमावसारनायनि दैदेनगिरि निन्थि (दिनेश) तालुकदार (85) आ दिने साननि 1:00 रिगायाव बरुपेटानि पकु रुदिन आली आहमेद फाहामथाइ फराइसालिमादि देहा फाहामसालियाव मिथिस' हायै बेरमाव गोलैनानै बे बुहुमखौ अराय समनि थाखाय नागर लांबाय। 40 बोसोर सानखान्थि आरो बिगियान आयदानि फोरेंगिरि मावबोनानै सरुपेटा गोजौ फरायसालिनिफरायनो गाहाइ



फोरेंगिरि महरै आजिरि लानानै सुबु सम्पद सोर्जिनायाव गावखौनो बावसोमबोनाय सासे गोखों दैदेनगिरिमोन। बै समाव तालुकदारआ आसाम गन संग्राम परिषद

आरो पिएलपि दोलोनि सासे रफोद दैदेनगिरि महरै सोमावसारनायाव बाहागो लादोंमोन। आसाम गन परिषद दोलोजों जोनोमनिफरायनो लोब्बा लाखिबोनाय दिननाथ तालुकदारआ थैजासिम बे दोलोजोंनो दंफायोमोन। अगप दोलोनि आन्सलिक आरो जिल्ला थाखोन गोबां बिबानखौबो रुजुन्दोंमोन। समाजआरि बिथिआवबो सासे वयजोंबो सिनायजानाय समाज सिबियारि जानो हादों। थैनाय समाव तालुकदारआ बिसि, सासे हाबा जानाय फिसाजला आरो साथाम फिसाजोफोरखौ नागरानानै बे संसारिफराय अराय समनि

थाखाय बिदाय लायो। तालुकदारनि हरखाव जिउ गोमानायाव भवानिपुर बिधान सभा बियाबनि एमएलए पनिधर तालुकदार, बारग' एमपि एबा आसाम सरकारनि बारग' मन्थि कुमार दिपक दास, बारग' एमएलए उ० मनरन्जन दास, सरुपेटा गोजौ फरायसालिनि सामलायगिरि, आसाम गन परिषद, आसु, आसाम जातीयताबदी युव सात्र परिषद, पभानिपुर बियाब प्रेस क्लब, इउपिपिएलजों लोगोसे गोबां दोलो आफद फसंथानफोरा गोथैयै दुखु मोन्याय फोरमायनायखौ नुनो मोन्दों।

(□ 1 बिलाइनिफ्राय)

केरेलायाव गिबि मन्थि उ० हिमन्त बिश्व शर्मानि बिसायख'थि फोसावदिंनय

गोख्रोडै सोलिगासिनो थानायखौ नुनो मोन्दों। बेबादिनो बावैसो सान सिगां हादरनि गाहाइ मन्थि नरेन्द्र मदि आरो बिजेपिनि आफादगिरि जेपि नाडुमोनहा आसामनि दाब-दाब जायगाफोराव एनडिनि बिजाथिफोरनि थाखाय बिसायख'थि फोसावदिं हाबाफारियाव बाहागो लाफैनायखौ नुनो मोन्दोंमोन। बे खेबाव आसामनि गिबि मन्थि उ० हिमन्त बिश्व शर्माआ रइज्योआव बिसायख'थि फोसावदिंनयखौ दोन्थ'नानै हादरनि गुबुन गुबुन रइज्योफोराव बिजेपिनि बिजाथिफोरनि थाखाय बिसायख'थि फोसावदिंनयखौ जागानाय नुनो मोन्दों। गिबि मन्थि शर्माआ दिने केरेला रइज्योनो वायानाथआव बिजेपि दोलोनि मोनसे गेदेर रड स्व' एबा लामा हान्जा सुनाय हाबाफारियाव बाहागो लाहदों। केरेलानि वायानाथआव बिजेपि दोलोनि बिजाथि के सुरेन्द्रनखौ देरहाहोनांगोन थाखाय खुंनाय बिजेपिनि मोनसे गेदेर लामा हान्जा सुनाय दिन्थिफुंनय हाबाफारियाव बाहागो लानानै गिबि मन्थि उ० शर्माआ कंग्रेस दोलोनि सायाव गोखों रवजों गालोबदों। उ शर्माआ बुंदीदि, कंग्रेस दोलोआ जुदि मिरु खुंथाइनि गोहोआव फैंफोनोब्ला हादरनि गोहोमखौ मुस्लिमफोरनि गेजेराव रानानै होफिनगोन। कंग्रेस दोलोआ मोनसेल' हरिनि सायाव नोजोर लाखियो नाथाय बिजेपिआ हादरनि गेजेराव थानाय गासै हरिफोरनि सायाव नोजोर लाखियो। कंग्रेस दोलोआ हादरनि फुंखानि गिबि मोन्थाइखौ मोनसेल' हरिनि होनायनि रेकड' दं नाथाय बिजेपिआ हादरनि लाइमोनफोर, आइजोफोर, एससि, एसडि, आबादारि, लेभार गासै थाखोन आरो गासै हरि माहारिनि सुबुफोरनि थाखाय समान मोन्थाइखौ मावफुदों। कंग्रेसआ मोनसे फोलेरनि आरो मोनसे नख'रनि गेजेराव' राजखान्थि खालामबोदों होनानै कंग्रेसनि सायाव गोखों रवजों सांखारिदों उ हिमन्त बिश्व शर्माआ।

कक्राझार बियाबनिफ्राय सा 12 बिजाथिफोरा बादायलायगोन

शरनियानि नमिनेसनलाइआ मैया रबिबारखालि बिसायख'थि आयगजों नेवसिजानायनि उनाव दिने साथाम बिजाथिफोरा गावसोरनि नमिनेसनलाइखौ बोखाना लायो। बिसोरनि गेजेराव जिएसपि (गन सुरक्षा घट्टि) दोलोनि घनश्याम दासजों लोगोसे गाव-गावसोरनि नमिनेसनलाइखौ गुबुन सानै बिजाथि फारियै-उदां बिजाथि शैलेन्द्रनाथ ब्रह्म आरो नन्देश्वर ब्रह्ममोनहा बोखाना लादों। मख'नो गोनादि, जिएसपिनिफ्राय गासै सा 3 बिजाथिफोर फारियै- नव कुमार शरनिया, घनश्याम दास, बिनिता डेकामोनहा नमिनेसनलाइ गथायदोंमोन। बेनि थाखायनो नव कुमार शरनियानि नमिनेसनलाइआ नेवसिजानायजों लोगोसे घनश्याम दासआ नमिनेसनलाइखौ बोखाना लानायाव जिएसपि दोलोनिफ्राय फसंजानाय बिजाथि बिनिता डेकाया कक्राझार लकसभा बियाबनि गासै सा 12 बिजाथिफोरनि गेजेराव सासेल' आइजो बिजाथि महरै बिसायख'थियाव बादायलायगोन।

कक्राझाराव फातेमाबाद साहा बागान

सामलायगिरिनि हेंथायै हेंथा सोमावसारदों

गोनांथार अजद दैखानानै लेबार मावसुमाफोरा मफिजुदिन आहमेद मुनि टिकादार सासेखौ रैखाथि होनायनि सार्थयावनो बागानखौ बन्द' लाखिनाय जादों होना मिबथिहोयो। मख'नो गोनादि, खामानि मावग्राफोरा मफिजुदिन आहमेद मुनि टिकादारखौ बागानाव हाबफेनो मोनैखौ फोसावनानै होदोंमोन। बेनि अनगायैबो बागाननि खामानि मावग्राफोरा मोनो गोनां दान-बाथानिफ्राय जागयजेनानै एरियार रेसननि अनगायैबो खामानि मावग्राफोरा मोनो गोनां गासै खाबुफोरनिफ्राय जानागारव थानो गोनां जादोंमोन। बे बिथिखव खामानि मावग्राफोरा गले-गले दाबि खालामबोनायनि उनावबो जायथि-जाया रोखोमनि मावफुंजायाखै। बेबायदिनो पिएफ बिफानयाव गावसोरनि गासै जेनाफोरखौ सुखानायनि थाखाय अर'ज खालामनायजों लोगोसे सामलायगिरि राजेश जालानखौ बागाननिफ्राय बोखारनायनि दाबि खालामदोंमोन। बेबायदिनैआव दिने लेबार बिफाननि गाहाइ मावखुलियाव जेनाफोरखौ सुखानायनि थाखाय दिने खामानि मावग्राफोरजों लोगोसे जालानखौ लिंहरनाय जादोंमोन। नाथाय सावरायलायनाय मेल खुंनायनि उनावनो पुलिसनि हेफाजाब लानानै जालानआ खारखोमा लानायाव खामानि मावग्राफोरनि गेजेराव गोखों फिन्जाथाय सोमजिदों। मानोना सावरायलायनाय मेलयाव साहा बागान सामलायगिरि राजेश जालानखौ बाहागो लाफेनो हांखायनाय जादोंमोन। नाथाय बियो लेबारफोरजों खुंनाय बे सावरायलायनाय मेलखौ राजेश जालानआ गोनांथि होयैनि अजद होनानै खामानि मावग्राफोरा फातेमाबाद साहा बागाननि सामलायगिरि जालानखौ बोखारनायनि दाबि दैखानाय थयो। बिसोरो गावसोरनि जेनाफोरखौ सुखानायनि थाखाय थाबैनो बागान बन्द' खालामनायखौ बोखारनायनि थाखायबो दाबि खालामदों। नाथाय नांजावफा बिफाननि गाहाइ बिबानगिरि रुपम भौमिकआ खामानि मावग्राफोर आरो राजेश जालानजों थाबैनो सावराय जथुम खुंनो बाश्रा होदों।

गसाईगाव जितनाल नार्जिनारि इंराजि

फरायसालिनि उथिसारनाय फरायसाफोरखौ ...

सेथि मासियाव उथिसार जानो हादों। बेनिनो गेजेराव आसमिता शर्मा मुनि फरायसाआ 83 जौखोन्दो नम्बर आरो मोन 4 लेथार लानानै सेथि मासियाव उथिसार जानो हादों आरो गासैबो फरायसाफोरानो मोजां जौखोन्दो नम्बर लानानै उथिसार जानानै गोमानाय लाबोदों। दिने जारागुरि जितनाल नार्जिनारि इंराजि फरायसालियाव उथिसार फरायसाफोरखौ बिमा-बिफा, फोरेंगिरि, फरायसालि सामलाय आफादनि गेजेराव गांफा-गांफा आरनायजों मान बावदों आरो गासै फरायफुनाय फरायसाफोरखौ इयुनाव गोमो सोलेंथाइ लालानो थुलुंगा होयो।

(□ 1 बिलाइनिफ्राय)

3थि खोलोबनि बिसायख'थिनि थाखाय सा 8 बिजाथिफोरनि...

बिजाथिफोरनि बिजाथिलाइखौ नेवसिनायखौ नुनो मोन्दों। आन्जाद खालामखानायनि उनाव 3 थि खोलोबनि लकसभा बिसायख'थिनि थाखाय गासै सा 47 बिजाथिफोरनि बिजाथिलाइखौ गनायथि होनायखौ नुनो मोन्दों। गुबुन फासैथिं बे 3 थि खोलोबनि खुंफुंजानो गोनां बिसायख'थिनि बिजाथिलाइ गथायनायनि गेजेराव कक्राझार बियाबनिफ्राय सा 3 आरो धुबुरी बियाबनिफ्राय सा 2 बिजाथिफोरा गावसोरनि बिजाथिलाइखौ बोखानानै लाबाय होना मिबथिनो मोन्याय जादों। लकसभा बिसायख'थिनि थाखाय गासै सा 47 बिजाथिफोरा बादायलायनो थाखाय साखा-फारा जानायखौ नुनो मोन्दों। बेनिनो कक्राझाराव बियाबआव सा 12, धुबुरी बियाबआव सा 13, बरुपेटायाव सा 14 आरो गुवाहाटीयाव सा 8 बिजाथिफोरनि बिजाथिलाइखौ गनायथि होनायखौ नुनो मोन्दों।

भवानिपुर धुमारपुरनि फहुमारा दैसायाव डाक बिफाननि ...

जि 3852 नम्बरनि गंसे डाक पाचैल लानाय मुवा-बेसाद लांग्रा गारिआ जात्राबथाय जानायाव सामलायनो हायै जानानै दालानिफ्राय फहुमारा दैसायाव गोलैलाडो। गारिनि सालायगिरिआ सरसनन्दा जोखोम जादोंब्लाबो जात्राबथाय जानाय गारिनिफ्राय ओंखारबोनो हायो। बेनि अनगायैबो गारियाव सालायगिरिनि अनगायै रवबो गैयामोन होना मिबथिनो मोन्याय जादों। फासैथिं जात्राबथाय सालियाव पुलिसआ फैनानै गोबाव सम नाजानायनि उनाव क्रेनि हेफाजाबाव जात्राबथायाव मोगा-मोगि जानाय गारिखौ बोखानो हायो।

दिल्ली एनसिआर बर' थुनलाइ आफादआ रंजालि बैसागु ...

उ० सुरथ नार्जरीआ बाहागो लादोंमोन। लोगोसे माननि आलासि महरै मिरु बर' थुनलाइ आफादनि नेहाथारि उ० प्रनबन्ज्यति नाजा4री, दिल्ली पुलिसनि स्पुनार दालाइनि जउन्त कमिसनार पि एन खिमेइ, नख'र बिफाननि मनिटर् कर्मिदिनि सोद्रोमा जे माइभिअ, आसाम साहित्य सभानि दिल्ली दालाइनि गाहाइ नेहाथारि शर्मिष्ठा बर्मन मोनहा बाहागो लायो। बेनि उनाव 21 एप्रिलखालि दिल्लीनि बड'लेण्ड भवनाव मिरु बर' थुनलाइ आफादनि आफादगिरि उ० सुरथ नार्जरी आरो नेहाथारि उ० प्रनबन्ज्यति नार्जरीजों दिल्ली एनसिआर बर' थुनलाइ आफादनि सोद्रोमाफोरा मोनसे सावराय मेल खुंनानै बर' राव-थुनलाइजों लोब्बा थानाय गोबां आयदा आरो जेनाफोरनि सायाव सावरायनाय जायो होनानै दिल्ली एनसिआर बर' थुनलाइ आफादनि फोसावदिं नेहाथारि दिपामनि ब्रस्मआ रादाब बिबुंसारनि गेजेरजों फोरमायहरदों।

सरुपेटानि आर्यभत्त एकाडेमि सेनियर सेकेन्डारियाव 100...

मोजांनो उथिसारनो हानाय सा 25 फरायसा-फरायसुलिफोरखौ दिने फरायसालियाव मोनसे मख'जाथाव हाबाफारिनि गेजेरजों मान बाउनायखौ नुनो मोन्दों। फरायसालिनि लोगो फोरेंगिरि प्रनब कलिताया दैदेन्याय बे मान बाउनाय हाबाफारियाव फरायसा-फरायसुलिफोरखौ दुंबुदयै बरायनानै मान बाउनायखौ नुनो मोनो। मख'नो गोनादि, बावैसो सान सिगां फोसावजानाय गोजौसिन गेजेरारि फरासालिनि आन्जादयाव सरुपेटारि आर्यभत्त एकाडेमि सेनियर सेकेन्डारि फरायसालिनिफ्राय आन्जादयाव बाहागो लानाय साफ्रोमबो फरायसा-फरायसुलिफोरानो उथिसारनो हादों। सा 25 आन्जाद होगिरिफोरनि गेजेराव सा 10 आनो डिस्टिंसन, सा 7 आ स्टार आरो सा 8 आ सेथि मासियाव उथिसारनो हादों। उथिसारनो हानाय फरायसा-फरायसुलिफोरखौ फरायसालिनि गोरुयु किशर कुमार चौधुरी, सोलेंथाय गाहाइ दिलीप कुमार मेथी, गाहाइ फोरेंगिरि माथब चन्द्र पाटवारि, लोगो गाहाइ फोरेंगिरि कुशल बर्मनजों लोगोसे फरायसालिनि फोरेंगिरि-मावफारियाफोरा खौसेयै मान बाउनायखौ नुनो मोन्दों।

(□ 1 बिलाइनिफ्राय)

कंग्रेसखौ लाथिख' खालामनानै मुसलमानखौ थगायग्रा दालालखौ फोजोबस्रांगोनः...

गोख्रॉनिफ्राय गोख्रॉसिन खालामदों। आसामनि दै सम्पद मन्थि पिजुस हाजरीकाआ बियाबनि गुबुन गुबुन ओन्सोलफोराव दाववायनवानै बिसायख'थि फोसावदिंनयाव बाहागो लाना ओन्सोलनि हा, दै, बार, अखां बिसायख'थिनि दोहौ लाबोनायखौ नुनो मोन्दों। सानफोरमबो 4-5 गेदेर-गेदेर सुबु गौमायाव बाहागो लानानै मन्थिआ बिसायख'थि फोसावदिंनयाव बाहागो लानानै कंग्रेस-एआइडिफएफखौ गोख्रॉ रवजों सांखारिनायखौ नुनो मोन्दों। थामथि खेबनि थाखाय नरेन्द्र मदिआनो गाहाइ मन्थि जागोन बेखौ रवबो हमथानो हाया। भटार रइज्योफोरा बे खेबाव बिजेपिनो भट होनानै कंग्रेसखौ लाथिख' खालामनानै। मानोना कंग्रेसआ थानाय 60 बोसोराव रइज्योनि जेबो मावलाडखै। कंग्रेसआ लाइमोन संग्रो-सिखलाफोरनो रं लानानैसो साखि होदोंमोन। सोरनोबा सरकारि न' होदोंमोनब्लाबो रं लानानैसो लुफुनानै होदोंमोन होना मन्थिआ अजद दैखाडो। बजेपि सरकारि समावनो दालाल आरो टिकाडारफोरा रं जानो हायै थासाारि सोमजिबाय। आथिखालाव हानि दालाल रं सुट होग्रा आरो उन्दै बैसोआव हाबा लाग्राफोरखौ जोबथेसालिनि आलासि खालामनानै ओन्सोल, समाजनि बेरेखाफोरखौ होखानो हानाय जाबाय होना मन्थिआ फोरमायदों। मन्थिआ फोरमायबावनाय बायदिब्ला, हानि दालाल, सुट होग्रा, थानानि दालाल बायदिफोरा मुसलमानफोरनि गामियाव बांसिन थयो आरो गोरिब थाखोन सुबुफोरनिफ्राय थगायनानै जानो नाजायो। नाथाय आथिखालाव बेफोरखौ जेबो खाबु होनाय जाला। दालाल, टिकाडार, थगायसुलाफोरा मुसलमान समाजनिफ्राय गोमालाब्लानो मुसलमान समाजआ जौगागोन होना मन्थिआ फोरमायनानै बेफोरखौ इयुनावबो जाजाबावनो लुबैयोब्ला कंग्रेसनो भट होनायनिफ्राय जानागाराव थानानै बिजेपिखौ बोजबनो थाखाय खावलायो। खुन्दु, कम्बलनि राजखान्थि खालामै खालामै मुसलमान रइज्योफोरखौ थगायबोनायनि पाबआव गबनानै गावसोरनो सिलिंखार जानायनि लामायाव होना कंग्रेसखौ गोख्रॉ रवजों सांखारिदों। बेनि अनगायैबो गोरिब थाखोन सुबुफोरनि थाखाय अरुनदय, बेसेन होनाडै माइरं बायदि बिथांखि आरो संग्रा गेस बायदि सरकारि बिथांखिफोरनि सोमोन्दै दै सम्पद मन्थिआ गुवारै फोरमायनानै होनायखौ नुनो मोन्दों।

कक्राझारआव टर्च लाइट जौंथारगोनः नब' ...

होनाया जिएसपि दोलोनि गुबै थांखि होनानै बिथाड बुडो। गुबुन फासैथिं, खौरंगिरि मेलाव बिनिता डेकाआ नब' कुमार सरनियाआ गावखौ राजखान्थियाव लाबोदों होना बुनानै बिथानि रइजो-राजाफोरनि थाखाय खामानि मावलांनयावो गिबि आरो गाहाइ होनानै बिथाड बुडो। गुबुन फासैथिं, नब' कुमार शरनियाआ खौरं बिजोनि सिगाडव बुझेदि, गुवनि हेंथायै खैसार खालामनाय सुबुखौ गात्रि मोना नाथाय आइरनि मदतजों फेगौ समाव जुजि लांगोन। बेरेखा हान्जाफोरखौ फेजेनानै कक्राझारआव टर्च लाइट फोजोंगोन होनानै रोखा खालामनानै होयो। बेनिखायनो जिएसपिनि सावगारि टर्च लाइटआव भट होनानै जिएसपिनि बिजाथि बिनिता डेकाखौ देरहा होनो थाखाय रइजो-राजाफोरनिमिस नब' कुमार शरनियाआ खावलायहरो।

बिसि-फंबाइखौ एसिदजों गाग्लोबनानै गावखौनो पुलिसनो गथायदों

देहा फाहामसालियाव गुदि फाहामथाइ होनानै उनाव गोजौसिन फाहामथाइनि थाखाय जिएसएएसआव दैथाइहरनाय जाबाय होना पुलिसनि सुलुडव फोरमायदों। सानैनिबो थासारिया खैफोदनिफ्राय बारग'दौब्लाबो आरोबाव गाहामसिन फाहामथाइ होबावनांगोन होना मिबथिनो मोन्दों।

कलाइगावनि ब्राइट लाइभ इलिसि गोजौ फरायसालिनि फिथाइआ मिजिंथिनाय ...

फरायसालिनि सा 10 फरायसाफोरनि साफ्रोमबो गुण गोनाडै उथिसारनायाव फरायसालिनि फरायसा आरो फोरेंगिरिफोरा गोजोनाय फोरमायदों। फासैथिं,उदालगुरि जिल्लानि सरकारि सोलेंथाय फसंथानफोरनि फिथाइआ मिजिंथिनाय बायदिदियै ओंखारैयाव बिमा-बिफाफोरनि गेजेराव गोसो गोजौनैखौ नुनो मोन्याय जादों।

नाग्रिजुलि आन्सलिक आसुनि बान्जायनायाव...

गोजौ फरायसालिनि गाहाइ फोरेंगिरि रबेन रभाआ बिरहोदों। 9:30 रिगायाव मुख्लं खामफायाव आलारि बाथि फोजोंदों कातरबारि गोजौ फरायसालिनि लोगो फोरेंगिरि दिपक कुमार पाटकआ आरो मुख्लं खामफायाव बिबार मान बाउयो तामुलपुर जिल्ला फरायसा आफादनि फोसावदिं नेहाथारि दिगन्त बेजबरुवाआ। 10:00 रिगायाव बिफां-फुलि गायनाय हाबाफारिखौ खुंनायनि उनावनो उन्दै-उन्दै हौवासा-हिन्जावसाफोरनि गेजेराव बायदि रोखोमनि गेलेमुवारि बादायलायनाय खुंनाय जायो। बेलासिनि 4:30 रिगायाव खुंनायाव गेवलां बिहुनि गेटखौ बेखेवना होयो कातरबारि गोजौ फरायसालिनि लोगो फोरेंगिरि फराक कुमार शर्माआ। गेवलां बिहुयाव बाहागो लाफेनाय ओन्सोलनि जर'खा सुबुफोरजों लोगोसे गुबुन गुबुन आन्सलिक फरायसा आफाद आरो जिल्ला फरायसा आफादनि बिबानगिरिफोरखौ गामसाजों बराय मान बाउनाय जादों। गेवलां बिहुयाव आसामनि गुबुन गुबुन जायगानि माखासे बिहु हुसुरि हान्जाया बिहु मोसना दिन्थिनानै रइजो-राजाफोरनि गोसोखौ मोजां मोनहोदों।

कल्कि 2898 एडी' निफ्राय अमिताभ बच्चननि अश्वत्थामा लुकआ सोराडाव पैदों

नाग अश्विननि 'कल्कि 2898 एडी' आव बलिउडनि रोंग'थि गोनां फावखुंगुर अमिताभ बच्चननि आखुखौ लानानै थानाय माखासे दाननिफ्राय सुबुंफोरनि गेजेख गोबां सावरायनाय जागासिनो दं। अमिताभ बच्चननि अनगायैबो दीपिका पादुकण आरो प्रभासखौ सावथुनाव गाहाइ फावआव नुनो मोनगोन नाथाय सावथुनाव बिग-बीनि फावखौ बयनिखुइबो गोनांसिन बुंनय जादों। आरसीबी आरो केकेआरनि लाइभ आइपिएल मेचनि समाव 'कल्कि 2898 एडी' नि मोनसे गोदान प्रम'



फोसावनाय जादों। बेजों लोगोसे बानायगिरिफोरा बिग-बीनि नुथायखौबो शेरार खालामदों, जेराव बिथांखौ मोनसे गुबुन आरो गोदान

आखुआव नुनो मोनगोन। कल्कि 2898 एडीनि टीजारनिफ्राय मिथिनो मोनोदि, अमिताभ बच्चनआ फेंगौ सावथुनाव अश्वत्थामानि फाव खालामगोन। टीजार प्रम'आ सासे गथ'जों जागायजेनो, जेराव बिग-बीखौ सोनाय जायोदि, बियो माल्बाबो थैनो हाया नामा। अमिताभ बच्चनखौ 'कल्कि 2898 एडी' नि टीजार

प्रम'आव गुबुन गोदान महरयाव नुनो मोन्दों। भिडिअ'नि जागायजेनायाव अमिताभनि गासैबो मोखांखौ सिजों खोबथेनाय जायो। एखे समावनो फावखुंगुरनि खुगायाव हाबु आरो मेगननि जौनायखौ दिन्थिनाय जायो, जायनि उनाव अमिताभ बच्चननि अश्वत्थामा नुथायखौ दिन्थिनाय जायो। बे नुथाया समाजारि बिजोडाव

सुबुंफोरनि गेजेराव सावरायनायाव थाबाय थयो। 600 कौटि रानि बाजेजजों बानायजानाय 'कल्कि 2898 एडी' खौ दासिमनि बयनिखुइबो बेसेन गोसासिन भारतारि सावथुन बुंनय जायो। नाग अश्विनजों लिरजानाय आरो दिथाहोजानाय बे सावथुना भैजातान्ती मुभिजजों दिहुनजानाय। बेराफारसेथिं दीपिका पादुकण आरो प्रभासखौ गिबि खेबनि थाखाय स्क्रन शेरारआव नुनो मोनगोन। अमिताभ बच्चननि अनगायैबो कमल हासन आरो दिशा पाटनीखौबो सावथुनाव नुनो मोनगोन। सावथुन 'कल्कि 2898 एडी' खौ 9 मे 2024 माइथायाव मुलुगनाडैनो सिनेमा हलफोराव रिलिज खालामनाय जागोन।

सलमान खाननि बिगुमै आयुष शर्माया गुलि गावनायनि सायाव बिबुंथि होदों



जेब्लानिफ्राय सलमान खाननि न'नि बायजोआव गुलि गावनाय जादोंमोन अब्लानिफ्रायनो मुम्बाइ सहाराव दावराव-दावसि जागासिनो दं। सानैसो सिगां फावखुंगुरनि न'नि बायजोआव 5 राउड गुलि गावनाय जादोंमोन जायनि उनाव पुलिसआ गावग्राफोरखौ हमदों। बेजों लोगोसे सलमान खाननि बिगुमै आयुष शर्माया बे केसआव सिरि थानायखौ सिफायदों। आयुष शर्माया खौर एजेन्सि एएनआइजों रायजलायदों। फावखुंगुरआ भाइजाननि न'नि बायजोआव गावलायनायनि सायाव फिनाय होयोदि, जों मुम्बाइ पुलिसनि खामानिखौ बाख्नायदों। बे मदतनि थाखाय मुम्बाइ पुलिसखौ जोबोद गोजेन्याय जासियो। आरबाजआ सानैसो सिगां सलमाननि न'आव गुलि गावनायनि सायाव मोनसे गोलाव पस्ट लिरदों। अरबाजआ गावनि पस्टआव लिरदोंदि, गेलेक्सी एपार्टमेन्टनि साखाथियाव मटर साइकेल सालायग्रा सानै सिनायमोनै सुबुंफोरजों गावलायनायनि जाथाया जोबोद जिगासिनो हानाय आरो गिथानामोन। बे सोमोनांथाव जाथायजों जौनि नख'रा सोमोनांदों। दुखुनांथाव जौनि नख'रनि खाथिनि होन्ना दाबि खालामनाय आरो बुंथिगिरि होन्ना दाबि खालामग्रा माखासे सुबुंफोर खौर बिजोंआव बिबुंथि होगासिनो दंदि, बेयो गासैबो मोनसे फोसावनायनि स्टन्ट नाथाय गासै नख'रा गोहोम खोखैजायाखै, जाय सैथो नख। आरबाजआ आरोबाव लिरबावदोंदि, बेनिखायनो बिसोरजों फोसावजानाय बेफोर गासैबो जिरादफोरखौ गोथौयै लानो नाड। नख'रा आथिखालाव बे दुखुनांथाव जाथायनि नायबिजिरनायाव पुलिसखौ हेफाजाव होगासिनो दं। जोंहा मुम्बाइ पुलिसनि सायाव फोथायनाय दं आरो बिथांमोनखौ खोथा होनाय जादोंदि, बिसोरो जौनि नख'रनि रैखाथिनि थाखाय गावसोरनि गोहोआव गासैखौबो मावगोन। नोंथानि अन्नाय आरो मददनि थाखाय नोंथांमोनिसिम बयखौबो साबायखर।

अकिता लखन्डेआ उन्दै समाव डायरीआवबो मोनसे बाथारखौल' लिरमोन

आथिखालनि समाव अंकिता लखन्डेनो जेबो सिनायथिनि गोनांथि गैया। पवित्र रिश्तायाव अर्चनानि फाव खालामनाय मोनसे नख'रारि मुं जानो हानाय अंकिता लखन्डेआ टिभि मुलुगनिफ्राय बलिउडआव दावबायदों। बिथाड रणदीप हुड्डानि सावथुन 'स्वतंत्रवीर सावरकर' नि बिग बस 17 फाइनालिस्टआ गोबां बाख्नायजादों। बिग बसआव बाहागो लाखांनयनि उनाव अंकिता लखन्डेआबो गावनि आखुनि थाखाय गोबां सोंखारिजानायजों मोगा-मोगि जानांदोंमोन। बावैसो दैनिक जागरणजों मोनसे जर'खा सावरायलायनायाव अंकिताआ टूलिनि सायाव गावनि फिनजाथायखौ फोरमायदों नाथाय बे समावनो बिथाड उन्दै समनि गोसोखांथिफोरखौ गोसोखांदों आरो फोरमायदोंदि, बिथाड बुंदोंदि, इयुनाव मा जानांगौ, मा जिउराहायाव थानांगौ, जोबोद बाडइ सुबुंफोर



उन्दै समाव बेनि सोमोन्दै रोखा थयो। जिखिनो जायामानो गावनि थाखाय सान्नाया गासैबो सैथो जानायाबो जाथावना नख। फावखुंगुरि अंकिता लखन्डेआ फोथायोदि, जुदि नोंथाड गावनि थाखाय माखासे बाथारफोरनि बादै सानोब्ला आरो थिरांथा लायोदि, नोंथाड बेखौ मावनांगोन अब्ला खाफालआबो बेखौ मदत होनो हयो। जायखि जाया, अंकिता लखन्डेआ बे फारिलाइआव हारसिं नख, जाय अन्सायगिरिफोरखौ गावसोरनि सिमांफोरखौ जाफुंहोनो थाखाय दिन्थिफुं'नायनि सोमोन्दै

बिद्या बालन, इलियाना डिक्रुज आरो प्रतीक गान्धीनि थामथि साननि 'दो और दो प्यार' बक्स अफिसनि रिपर्टआ ओंखारबाय। बिद्या बालन आरो प्रतीक गान्धीजों फाव खालामजानाय बे सावथुना 19 एप्रिलाव सिनेमाहलफोराव रिलिज जादोंमोन। बे सावथुना सुबुंफोरनिफ्राय गोबां अन्सायनाय मोन्दों। माखासे सुबुंफोरा फावखुंगुरिनि दिन्थिफुं'नायखौ बाख्नायदों। सेकनिलकनि बायदिव्ला, 'दो और दो प्यार' आ गिबि सानाव



फ्राय 50 लाख रं आर्जिनो बैक्स अफिसआव लासै लासै

जागायजेन्दोंमोन। नैथि सानाव बुधुमनाया 95 लाख जाबाय।

गाहाम देहानि राहा

डाइबेटिज बेरामिफोरनि थाखाय तरमुज जानाया सावत्रिनि थाखाय मुलाम्फा गोनां

डाइबेटिज

बेरामिफोरा गावसोरनि आदारनि सायाव बांसिन सांग्रां जानांगौ। जानाय आरो लौनायजों सुगारनि थाखोआ गोखैनो बाडइ जायो आरो बांलाडे। ब्लाड सुगारखौ लाखिनो थाखाय नोंथाड आदाराव खालि सावत्रिनां मुवाफोरखौल' सोफानांगौ। आदाराव बांसिन फिथाइ-सामथाइ आरो मैगं-थाइगंफोरखौ लाफानानै डाइबिटीजखौ सामलायनो हायो। बबेखानि माखासे फिथाइफोर दं जायहा मिथिगायारि गोदै थयो। बेबादि थासारियाव बे फिथाइफोरखौ जानांगौ। बेबादिनो मोनसे फिथाइया जाबाय तरमुज, जाय जानो थाखाय जोबोद गोथाव, गोदै आरो रोसिगोनं। तरमुजआ फाइबर आरो दैजों बुंफबनाय नाथाय डायबेटिज बेरामिफोरा बेखौ जानो हागोन नामा? निउट्रिशनस्ट, लिरथाय खमायनाय कच आरो 'केट' डायेटिशियन डा. स्वाति सिं'हनिफ्राय जौनो मिथिहोयोदि, जायखिजाया आदारनि ग्लाइसेमिक इन्डेक्सआ बेखौ थि खालामोदि, आदारा नोंथानि देहायाव ब्लाड सुगारनि थाखोखौ बेसेबां गोखै गोहोम



खोख्लै गोन। आदारनि ग्लाइसेमिक इन्डेक्सखौ 0-100 नि गेजेराव सुनाय जायो। ग्लाइसेमिक इन्डेक्सआ जेसेबां गोखै, आदारा एसेबांनो गोखै सुगारनि थाखोखौ बांहोगोन। तरमुजआ मोनसे बेबादि फिथाइ जायहा हाइ ग्लाइसेमिक इन्डेक्स थयो। डाइबेटिज बेरामिफोरा हाइ ग्लाइसेमिक इन्डेक्स गोनां जाग्रा आदार जानाड। तरमुजनि ग्लाइसेमिक इन्डेक्सआ 70 निफ्राय 72 सिम जायो। तरमुजआ मोनसे दैजों बुंफबनाय फिथाइ बेनिखायनो बेनि ग्लाइसेमिक इन्डेक्सआ खमायलाडे। जुदि नोंथाड 120 ग्राम तरमुज जायोब्ला बेनि ग्लाइसेमिक इन्डेक्सआ 5 निफ्राय 6 सो जागोन। बेनिखायनो डायबेटिज बेरामिफोरा तरमुज जानो हायो। मानोना बेयो दै आरो फाइबरजों बुंफबनाय फिथाइ। डाइबेटिज बेरामिफोरा खेबसेआव 100 निफ्राय 150 ग्राम तरमुज जानो

हायो। सानसेआव बेनि बांसिन तरमुज जानायनिफ्राय गोजानाव थानांगौ। सुगार बेरामिफोराबो तरमुजनि रोसि लौनायनिफ्राय गोजानाव थानांगौ। मानोना बिदैयाव फाइबर एसेबो थाया। बेयो सासे डायबेटिज बेरामिनि सुगारनि थाखोखौ बांहोनो हागौ। गोलोम बोथोरार देहाखौ हाइड्रेटेड लाखिनो थाखाय तरमुजखौ जानांगौ। तरमुज जानाया उदेंखौ थाबैनो आबुं खालामो आरो देहायाव दैनि आंखालखौ सुफु डो। तरमुज जानाया लिरथाइखौ बाडइ खालामनायावबो मदत खालामो। तरमुजआ फाइबरजों बुंफबनाय मोनसे फिथाइ, जाय उदेंखौ मोजाडे लाखियो। तरमुजखौ हजम खालामनायाव जोबोद गोरलै। बेयो देहायाव भिटासिमि सि होयो। तरमुजआ गोलोम बोथोरनि थाखाय मोनसे मोजां फिथाइ, थारैनो बेखौ जाग्रा आदाराव सोफादेरनांगौ।

रितेश देशमुखआ रामललायाव दावबायहैदों



22 जानुवारीखालि गासै हदराव मोनसे जारिमिनारि बुब्लि नुदोंमोन जेब्ला गाहाइ मन्थि नरेंद्र मदिआ आयध्यायाव रामललानि मुसुखाखौ बावनाय फोर्बोंआव बाहागो लादोंमोन। जेराव गोबां सेलेब्रिटीफोरा दासिमबो राम मन्दिरखौ नायनो थंगासिनो दं आरो माखासे सुबुंफोरा प्राण प्रतिष्ठा फोर्बोंनि उनावबो गोबां खेब दावबायहैबाय। आथिखालाव अमिताभ बच्चननि अनगायैबो बलिउडनि मुंदांखा जरा' रितेश देशमुख आरो बिथांनि बिसि जेनेलिया देशमुखआबो बे फारिलाइआव हाब्बाय। बिथाड गावनि फिसाज्लाफोर रियान आरो

राहिलजों लोगोसे भगवान रामखौ आर'ज गाबनो थानसालियाव थादों।रितेश आरो जेनेलियाआ 20 एप्रिलखालि गावसोरनि फिसाज्लाफोर रियान आरो राहिलजों आयध्याय राम मन्दिराव थादों आरो 21 एप्रिलखालि जरा'या गावसोरखौ लोगो हमनो फैनयनि सावगारिफोर शेरार खालामदोंमोन। माखासे सम सिगां फावखुंगुरआ गावनि इन्सटाग्राम हेन्डेल्सआव जेनेलिया देशमुखखौ टेग खालामनाय मोनसे सावगारि शेरार खालामदों, जेराव बिथांखौ गावनि नख'रजों लोगोसे आयध्यायनि राम मन्दिराव रामललानि बोर लानाय

नुनो मोनो। बे सावगारियाव नख'रखौ सिबिनायजों रामललानि फुजा खालामनाय नुनो मोनो। नैथि सावगारियाव थानसालिनि मुसुखानि मोनसे नुथाय नुनो मोनो। रितेश देशमुखआ बिसि जेनेलियाजों सावगारि शेरार खालामना लिरदोंदि, 'मन्त्र से बदेके तेरा नाम, जय श्री राम! रामललायाव गिदिर दर्शन खालामनो मोन्नाने बोर मोन्दों! रितेश आरो जेनेलियाआ थानसालिनि पुजारी सन्तोष तिवारीखौबो लोगो हमदोंमोन, जाय बलिउडनि जरा'नो रामनामी आरो चन्दन प्रसादबो होदोंमोन। खामानिनि बिथिखव महाराष्ट्रनि बार' गिबि मन्थि रंसारि भिलासराव देशमुखनि फिसाज्ला रितेश देशमुखखौ थाबैनो सनाक्षी सिन्हाजों सावथुन 'ककुडा', 'रेड 2' आरो 'ब्लास्ट' आव नुनो मोनगोन। 'ककुडा' आ आदित्य सरपतदारजों दिथाहोजानाय मोनसे हरर-कमेडी सावथुन।

बिद्या बालननि सावथुन 'दो और दो प्यार' आ सानथामाव गोबां रां बुधुमबाय

थामथि साननि बुधुमनायखौ फोसावनाय जादों।सावथुन 'दो और दो प्यार'आ बक्स अफिसआव थामथि सानाव 1.15 कौटि रं आर्जिनो हादों। सेनिलकनि रिपर्टनि बायदिव्ला, सावथुना बक्स अफिसआव सिगांनि सानैयाव गाञ्जि दिन्थिफुंदों आरो भारतआव फ्राय 1.50 कौटि खामायदोंमोन। बे सावथुना सप्ताहनि जोबनयनिफ्रायबो जेबो मुलाम्फा मोनाखै। बेबादि थासारियाव सावथुना सानथामाव गासै 2.65 कौटि रं आर्जिनो हादों। बिद्या

बालननि अनगायैबो प्रतीक गान्धी, इलियाना डिक्रुज आरो सेन्थिल रामुर्तिआबो सावथुन 'दो और दो प्यार' आव गाहाइ फावआव दं। बेखौ भारतआव 543 स्क्रीनफोर आरो गुबुन हादरफोराव 271 स्क्रीनफोराव फोसावनाय जादों। 'दो और दो प्यार' खौ बात्था मोनगिरि एड सावथुन दिहुनगिरि एपेक्स गुहा ठाकुरताया दिथा होदों। 'दो और दो प्यार' खौ एप्ल'ज एन्टारटेनमेन्टजों दिन्थिफुं'नाय जादों आरो एलिप्सस एन्टारटेनमेन्टजों दिहुनजानाय।

श्रीलंकायाव कार रेसिंनि समाव जानाय जाब्रबथायाव सा 7 सुबुंफोरनिजिउ ख'हा

कलम्ब, 22 एप्रिल : श्रीलंकानि सेन्ट्रल हिलआव मोनसे मटर कार रेसिंनि समाव जानाय जाब्रबथायाव 8 बोसोर बैसोनि सासे गथ'जों लोकोसे सा 7 सुबुंफोरनिजिउ गोमायो आरो सा 23 गुबुनफोरा गोब्राबै जोखोम जायो। श्रीलंकानि सान्श्रिफोरा माहारियारि गोदान बोसोरनि समाव थानाय रबिबारखालि कार रेसिंखौ खुंदोमोन। पुलिस बुंथिगिरि डिआरजि निहान थल्लुवाआ फोरमायदोदि, गोब्राबै जोखोम मोननाय सा 23 सुबुंफोरखौ देहा फाहामसालियाव थिसननाय जाबाय। फाक्स हिल सुपार क्रस 2024 याव बाहागो लानाय गंसे कारा ट्रेकिंगफ्राय ऑखारनाय



नायगिरिफोरनि गेजेराव हाबो। बेयाव रेसिंखौ नायनो थाखाय 1 लाखनिखुइ बांसिन सुबुंफोरा ज' जादोमोन। बे रेसिंखौ श्रीलंकानि गेजेर हाइलेन्डसनि दियातलावायाव खुंदोमोन। दियातलावायाव सान्श्रिफोरनो ट्रेनि होनाय जायो। एप्रिल दानाव सिंहली गोदान बोसोरनि समाव छुट्टि फालिबाय थानाय सुबुंफोरा सेन्ट्रल हिलसआव खौसे जायो

आरो कार रेस खारनाय बारनाय बायदि बादायलायनाय जायो। फाक्स हिल रेसखौ थानाय 2019 आव इस्टार सान्डे गार्लोबनायनि उनाव बन्द' खालामना होदोमोन। 5 बोसोर उनाव बे रेसखौ खुंफिनाय जायो। नाथाय खाफाल गात्रियै रबिबार खालि जानाय बादायलायनायाव बे जाब्रबथाइया जायो।

गोदानै बानायनाय हादतयारि मिसाइलआ जेब्लाबो चीन आरो पाकिस्ताननि फार्से नोजोर लाखिबाय थागोन

गोदान दिल्ली, 22 एप्रिल: पाकिस्तान आरो चीननि सिमना ओन्सोलखौ रेखाथि खालामनो थाखाय भारतआ हादतयारि प्लान थियारि खालामदों। अदेबानि भारतयारि सान्श्रिफोरा चीन, पाकिस्तान सिमनाफोरनि थाखाय 6,800 कौटि रानि हादतयारि पाप्पिनिफ्राय गावहरजाग्रा मिसाइल प्रजेक्टनि सायाव खामानि मावगासिनो दड'। सिमना ओन्सोलफोराव अख्रांआरि अलखदफोरनिफ्राय बारग'नो थाखाय भारतआ बे बिथांखिनि सायाव गोखोडे खामानि मावगासिनो दड'। भारतयारि सान्श्रिफोरा हादतयारि महरै जोबोद खम जान्थाइनि एयार डिफेन्स सिस्टेमखौ



डेभेलप खालामनो थाखाय 6,800 कौटि रानिखुइ बांसिननि मोनै प्रजेक्टनि सायाव खामानि मावगासिनो दड'। मेक इन इन्डियानि गेजेरजों सान्श्रिफोरा 500 निखुइ बांसिन लान्चार आरो गासै 3,000

मिसाइलफोरखौ दिहुनो आरो बायनाय बिथांखिनि सायाव खामानि मावगासिनो दड'। रेखाथि बिफाननि बिबानगिरिफोरा बुडोदि, भारतआरि सान्श्रि आरो अख्रांमा सान्श्रि फोरनाव भिसराड

मिसाइलफोरा दड'। बेराफार्से आइएल, आइएम भि सरड मिसाइल नेम-खांथिखौ थानाय 1989 याव सोफादोमोन। बेनि उनाव 2013 याव बिनि डि-इन्डाक्शननि बिथांखि लादोमोन। बे मिसाइलआ सिमनायाव

सुथुरफोरनि इन, दावहार उरं जाहाजफोर आरो हेल्किप्टरफोरनिफ्राय रेखाथि होगोन। बे बिथांखिआ भारतआरि सान्श्रि आरो अख्रांमा सान्श्रिनो जमायना होनो थाखाय 200 लान्चार आरो 1200 मिसाइलफोरखौ दिहुनायनि थाखाय जागोन। बे बिथांखियाव भारतयारि सान्श्रिनि लिडारआ दड, जाय बे मिसाइलफोरनि बयनिखुइ बावसिन बाहायगिरि। बिसोरनि गेजेराव मोन 700 मिसाइलफोरखौ सान्श्रि आरो भारतआरि जर'खा अख्रांमा सान्श्रिफोरा मोनो हागौ। फार्सेथि डिआरडिअ लेजार बिम राइडिं भि सरडनि प्रडाक्शननि थाखाय अदानी डिफेन्स आरो आइ-कमजों लोकोसे खामानि मावगासिनो दड'।

इरानआ 40 किल'मिटर दै लामाखौ होबथायोब्ला मुलुगआ गोबां जेनायाव गोठलैगोन

गोदान दिल्ली, 22 एप्रिल : इरान-इज्राइल दावहानि सायाव बिजिरसंगिरिफोरा बुंदोदि, इरानआ जुदि हर्मुज लैथो गेजेरनि लामाखौ बन्द' खालामोब्ला गोथां थाव आरो एलएनजिनि बेसेनफोरा बांनो हागौ। बे लामाजोंनो भारतआ सौदि आर'ब, इराक आरो इउएनिफ्राय गोथां थावखौ हादतआव लाबोयो। मख'जाथावदि, इरान आरो इज्राइलनि गेजेराव दावहाया थानाय माखासे साननिफ्राय गोखोंसिन जाबोदों। इरानआ इज्राइलआव इन आरो स्केटजों गार्लोबनायनि उनाव इज्राइलआ मिसाइलजों गोखों फिनजाथाइ होदों। मख'जाथावदि, बे दरनै हादतनि गेजेराव दावहा जानायनिफ्राय गोथां थावनि बेसेना मोनफ्रोम बेरलआव 90 आमेरिकान डलारनि साखाथियाव सौफै बाय।



मतिलाल अशवाल फाइनैन्सियल सार्भिसेसआ बुंदोदि, दावहानि जेनाखौ बाडइ खालामनो नाजानायजों खौफोदखौ सामलायनो हानायनि आसा दड। नाथाय इरानआ हर्मुज दै लामाखौ होबथायोब्ला थाव आरो एलएनजिनि बेसेनफोरा गोखौबै बांनोहागौ। हर्मुज दै लामाया

अमान आरो इराननि गेजेराव गासै 40 किल'मिटर गुवार मोनसे लैथोमायारि दालां एबा लामा। बे लामाजोंनो सौदि आर'बआ सानसेयाव 63 लाख बेरल, इउएइ, कुबेट, कातार, इराक बायदि हादतफोरा सानसेयाव 33 लाख बेरल आरो इरानआ सानसेयाव 13 लाख बेरल गोथां थाव

दैथाइहरो। ग्लबेल एलएनजि फालांगिनि 20 जौखोन्दो बाहागोया बेनि गेजेरजोंनो थाडे। मतिलालआ बुंबावदोदि, बे लिक्विड नेसारेल गेसनि थाखाय जेबो साबजाथाव लाना मोननाय नडा। भारतआ सौदि आर'ब, इराक आरो इउएनिफ्राय बे लामाजोंनो थाव आरो एलएनजिखौ लाबोयो।

आमेरिकाया इज्राइल सान्श्रिनि सायाव गिदिर अक्शन लानो हासिगौ

जेरुजालेम, 22 एप्रिल: इरान-इज्राइलनि गेजेराव सोमजिनाय गोदान दावहानि गेजेरजों आमेरिकाया इज्राइलनि मोनसे सान्श्रि हान्जानि सायाव बेन खालामनायनि सायाव सावरायगासिनो दड। आथिकालाव इज्राइलनि सान्श्रिफोरा रबिबारखालि बुडोदि, बिसोर गावसोरनि सान्श्रि हान्जानि हेंथायै आमेरिकानि बेन खालामनायनि सोमोन्दै जेबो खौरं मोनाखै। अदेबानि मिडिया रिपोर्टफोराव नुजाथिदोदि, इज्राइलनि सान्श्रि हान्जानि सायाव बिसोरि वेस्ट बैंक (गाजा) याव सुबुंथियारि मोन्थायफोरखौ सिफायदों होन्ना दाय जाबसिन्दों। आमेरिकाआ बेखौ लानाने इज्राइलनि सान्श्रि हान्जानि सायाव गिदिर थांखि लानायनि बिथांखि लादोमोन।



बेराफार्से, इज्राइल सान्श्रिआ बुंदोदि, तेत्जाह येहुदा बेटेलियनआ बिसोरनि एक्टिभ दावहारु आफाद, जाय हरिमायारि आयेनफोरनि बायदि खामानि मावयो। सान्श्रिआ बुंदो, बेटेलियननि हेंथायै बेन खालामनायनि सोमोन्दै रिपट फेनायनि उनाव हेंथायै बेन खालामनायनि सोमोन्दै रिपट फेनायनि उनाव आइडिफआ बेनि खौरं मोनाखै। जुदि केसनि सायाव माबाफोर थांखि जानाय जायोब्ला बेखौ नायबिजिरनाय जागोन। इज्राइलनि सान्श्रिफोरा

खामानि मावयो आरो उनावबो सरसनस्ना नडे जाथाइफोरखौ आयेननि गेजेरजों नायबिजिरनो थाखाय खामानि मावनायखौ सोलिहोलांवाय थागोन। बेनि गेजेरजों इज्राइलनि रेखाथि मन्थि बेनि गेन्टजआ एक्सआव लिरनाय मोनसे परस्टआव बुडोदि, आं गावनि आमेरिकानि लोकोफोरखौ बाख्यायो। नाथाय आइडिफ आफाद आरो बिसोरनि सान्श्रिफोरखौ बेन खालामनाय थांखिया मोनसे गिखंथाव थांखिखौ दिन्थियो। बेयो दावहानि समाव जौनि

सुथुरफोरनो गोरोन्थि इसारा होयो। सुलुनि बायदिब्ला, आमेरिकानि गुबुन हादतनि मन्थि एन्टनी ब्लिंकनआ माखासे साननि गेजेरावनो येहुदानि हेंथायै होबथानायफोरखौ फोसावनो हागौ। बेयो गिबि खेब जागोन, जेब्ला आमेरिकाआ इज्राइलनि सान्श्रिआरि आफादफोरनि सायाव बेन खालामगोन। फार्सेथि, इज्राइलनि सायाव इराननि बावयैसो सिगां गार्लोबनायनि उनाव गेजेर सान्जहा दावरावआ सोलिगासिनो दड।

नेहानि बिफाया पुलिसनि सायाव सांग्रांथि गैयैनि दाय जाबसिन्दों



बेंगलुरु, 22 एप्रिल: बुथारनायनि सायाव रइन्जोआव धर्ना होनाया गोखोंसिन जादों। बेनि गेजेरजों बिफा निरन्जन

हिरैमथआ कर्नाटक पुलिसनि सायाव गिदिर दाय जाबसिन्दों। बिथाडा बुंदों पुलिसआ

नायबिजिरनायाव सांग्रांथि गैयै खालामनाने केसखौ डायभार्ट खालामना नाजागासिनो दड'। खौरं एजेन्सि एएनआइनि बायदिब्ला, हुवल्लि-धारवाइ नगर निगमनि कंग्रेस पार्षद निरन्जन हिरैमथआ बे सांग्रांथि गैयैनि थाखाय बे केसनि बिबानगिरि पुलिस कमिसनारखौ ट्रान्सफार खालामनो दाबि दैखादों। बिथाडा बे केसखौ मिरुआरि नाइबिजिरग्रा आफाद ऐबा सिबिआइखौ नायबिजिरनो दाबि दैखादों। नेहानि बिफाया

बुंदों, आं सा 8 सुबुंफोरनि मुं होदों। नाथाय पुलिसआ दासिमबो सारसेबो सुबुंखौ हमाखै। आथिखालाव आंहा पुलिसनि सायाव फोथानाय गैलिया। मानोना बिसोर आनि केसखौ सांग्रांथि गैयै खालामनो नाजागासिनो दड'। जुदि नोंथांमोनहा बेबादि खालामनो हायाब्ला बेखौ सिबिआइनो होदो। बे केसआव सासे आइजो कमिसनार दड, अब्लाबो बियो सासे हिन्जावसाखौ बुथारनाय केसखौ गोनांथि लायाखै। बियो सोरनिबा नारसिन्नायाव खामानि मावगासिनो होन्ना नेहानि बिफाया बुंदों। निरन्जन हिरैमथनि दाय जाबसिन्नायफोरनि सायाव बिजेपिआ कर्नाटक सरकारखौ बेंखन्दों। बियो रावबो कंग्रेस दैदेनगिरिआ थैनाय नेहा हिरैमथनि बिफा निरन्जन हिरैमथजों लोको हमाखै होन्ना बुंदों।

रस बाउलआव खुंजादोंमोन। मख'नो गोनादि, 2026 नि वर्ल्ड कापआव गासै मोन 48 हान्जाफोरा बाहागो जागोन। जाउनाव मेचनि हासखौ बारयनानै खेब 104 सिम लांनाय जाबाय।

फिफा वर्ल्ड काप 2026 आ दर 16 सहरफोराव खुंजागोन

पेरिस, 22 एप्रिल: 2026 आव फिफा वर्ल्ड कापनि फाइनलआ नियकआव थानाय निउजार्सिनि मेडलाइफ स्टेडियमआव खुंजागोन। फिफा वर्ल्ड कापखौ खुंफुंग्रा आफादआ बेनि सायाव सिगांनो रोखा खालामदों। वर्ल्ड कापनि फोसावनाय सिडिउल्लड बादियै 2026 नि 11 जुनखालि मेक्सिक' सिटिनि एजटेका स्टेडियमआव मेचआ जागायगोन। बेनि सायाव फिफानि आफादगिरि जियनी इन्फेन्टि'आ दासिमनि गेजेराव दरथाम हादर फारियै कानाडा, मेक्सिक' आरो आमेरिकाजों जुथायै खुंजानो लानाय बे मेगा टुर्नामेन्टआव जर'खा सेलेन्ड नुनो मोनगोनखौ मिजिंथिदों। बिथाडा बे समाव गासै दर 16 सहरफोरनि स्टेडियमफोराव गासै खेब 104 मेचफोर



गेलैनायजों गोदान सेम्पियननि महर नुनो मोनगोनखौ फोरमायो। बिथाडा फोरमायबावनाय बादिब्ला, आटलान्टा आरो डलासआ सेमिफाइनलखौ बान्जायगोन। जेराव थामथि मासिनि मेचआ मियामीआव खुंजागोन। क्वार्टर फाइनलनि मेचआ लस एन्जिल्स, केन्सास सिटि, मियामी आरो बस्टनआव

खुंजागोन। दरथामबो हादरनि गासै दर 16 सहरफोरनि मेचफोरखौ मोजाडै खुंफुनो थाखाय दरथामबो हादरआव नोजोरथि होलायगोन। जायनि फारिआव बांसिनै मेचआ आमेरिकायाव खुंजागोन। 1994 नि वर्ल्ड कापआवो आमेरिकायावनो खुंजादोंमोन। जेराव फाइनल मेचआ लस एन्जिल्सनि पास पासाडेनाआव

फैगौ 15 आगस्तसिमाव 2 लाखसिमनि आबादारि लनखौ रेहाय होनाय जागोन

हाइद्राबाद, 22 एप्रिल: तेलेंगानानि गिबि मन्थि ए रेवन्त रेड्डीआ मेडक जिल्लानि एडुपायला मन्दिरनि दुर्गा बिमानाव बोर बियोदि, 15 आगस्तसिमाव राइन्जोयाव 2 लाखनि आबादारि लननि रेहायखौ फोसावनायाव जाहथे जाफुंसार जायो। बे समाव बिथाडा कंग्रेसआ फैगौ 10 बोसोरसिमाव खुंथायाव थागोन होन्ना बुडो। थानाय शनिबारखालि कंग्रेस बिजाथि



निलम मधुनि मदतयाव मेडक सहराव मोनसे बिसायख थियारि रेलियाव बिथाडा आबादारिफोरनो खोथा होयोदि,

बोरियाव थानाय देवी आरो मन्दिरखौ सिबियो। बे समाव मन्थि दामदर राजनरसिम्हा, कन्डा सुरेखा आरो टिपिसिसिनि, मावफारिया आफादगिरि जग्गा रेड्डीआबो नुजाथिदोंमोन। मेडक सेसद मासिनिफ्राय गान्धी नख'रजों थानाय सोमोन्दोनि सोमोन्दै बिथाडा बुडोदि, मेडकयाव इन्दिरा गान्धीनि हाबा मावनाय समावबो उद्दगआरि जौगाखांदोंमोन, जेरावनिफ्राय

जाहाजफोरनि थाखाय खुलिना होनाय जाबाय। अरायथा नडै गोदान लामाया 20 फुट गोथोंजों लोकोसे गोबां अन्जिमनि जाहाजफोरखौ जाहाज गाथोनसिम सौहैहोनायनि लामा दिन्थियो। बोरि रेखाथि हान्जा आरो जाहाज गाथोन केप्टेन अ कन्लआ मोनसे खौरं फोसावदिआव बुडोदि, क्रुआ

गाहाइ चेनेलखौ खुलिफिन्नायाव नांथावदों। माल रोगाग्रा जाहाजजों सौग्रावनायाव थानाय 26 मार्चयाव ब्रिजआ बायग्रबो आरो बिनि उनाव हान्था-मेलाला बन्द' जानाने थादोंमोन। हान्था-मेलानि थाखाय गिबि अरायथा नडै चेनेलखौ 1 एप्रिलाव खुलिना होनाय जायो।

बाल्टिमर जाहाज गाथोनसिम हान्था-मेलानि थाखाय थामथि अरायथा नडै चेनेल खुलिदोंमोन

बाल्टिमर, 22 एप्रिल : बाल्टिमर जाहाज गाथोनसिम नावफोर थांलाय-फैलाय खालामनो थाखाय मोनसे थामथि अरायथा नडै चेनेलखौ खुलियो। फ्रान्सिस स्टक ब्रिजनि मोनसे बाहागोया बायग्रबनायजों जाहाज गाथोनसिम सौहैनायाव जेना सोमजिदोंमोन। ब्रिजनि गोदोनाय बाहागोफोरखौ बानायफिन्नायनि सिगां रेखा खालामनो नाजानाया सोलिगासिनो दड। जाहाज गाथोननि बिबानगिरिफोरा थानाय शुकुबार हर गेजेराव फोसावोदि, गोदोनाय ब्रिजनि सा-सान्जहा थानाय चेनेलखौ फालांगियायारि महरै गोनांथि जानाय

इन्दिरा गान्धीआ 1980 याव देरहासारदोंमोन। कंग्रेसआ मेडकखौ माल्ताबाबो बावनाय नडा। मानोना सुबुंफोरा इन्दिरा गान्धीनो गोबां भट होदोंमोन। सिगम रेड्डीआ बिजेपि बिजाथि रघुनन्दन रावनो गिबि एमएलए महरै मेडकयाव गावनि बिहोमा दिन्थिनायखौ सेलेन्स होयो। बिथाडा बुडो जुदि रघुनन्दन रावआ जोंनो गावनि बिहोमाखौ दिन्थिनो हायोब्ला जों सेलेन्स होनो थियारि।

डि गुकेशआ केन्डिडेटस चस टुर्नामेन्ट देरहानाय लाइमोनसिन गेलेगिरि जानो हाबाय

गोदान दिल्ली, 22 एप्रिल: भारतन 17 बोसोर बैसोनि ग्रेन्ड मास्टर डि गुकेशआ टस्टआव जालानाय केन्डिडेट चस टुर्नामेन्टआव जासिमिन सोरजिदो। बिथाडा बे वर्ल्ड बिमुंखौ देरहानायन थाखाय उन्दैसिन बैसोआव सेलेन्ज होनाय गेलेगिरि जाबाय। गुकेशआ वर्ल्ड सेम्पियन बिमुनि थाखाय चीननि बादायारि डि लिरेननि सेलेन्जआव ओंखारगोन। गुकेशनि सिगां 1984 आव रासियानि गेलेगिरि गेरि कास्परभा 22 बोसोर बैसोआव बे बिमुंखौ देरहानाय लाइमोनसिन गेलेगिरि जादोमोन। गुकेशआ बिमुनि थाखाय लिरेननि सेलेन्जआव ओंखारदोब्लाबो बे टुर्नामेन्टनि बिमुनि मेचआव बबेआव जागोन आरो मास्टर जागोन बेनि सायाव दासिमबो रोखा खौरा ओंखारखै। भारतीय गेलेगिरि गुकेशआ टुर्नामेन्टआव गासै 14 नि गेजेराव 9 पइन्ट आर्जिदोमोन। बिमुनि साखाथियाव सौहैदो।



बिथाडा टुर्नामेन्टनि जोबथा बादायनायाव आमेरिकानि हिकार नाकामुयनि हेंथायै डूमे गेलेदो। बेजो बिथानि पइन्टआ 8.5 निफ्राय आवगायनायै 9 सिम सौहैदो। गुकेशआ फ्रान्सनि फिर्जा अलिरेजाखौ फेजेनानै 8.5 पइन्ट आर्जिदोमोन। अलिरेजाखौ फेजेनानायजो गेलेगिरिआ टुर्नामेन्टआव नेपमनियाचि, नाकामुरा आरो आमेरिकानि पेभियान कारुआनानिफ्राय हाफ पइन्ट आवगायनो हादो। भारतीय गेलेगिरिआ बे टुर्नामेन्टखौ

देरहानाय नैथि गेलेगिरि जाबाय। जेयव बेनि सिगां खेब 5 वर्ल्ड सेम्पियन बिस्वनाथन आनन्दआ 2014 आव 45 बोसोर बैसोआव बे टुर्नामेन्टखौ देरहादोमोन। देरहानायनि उनाव गुकेशआ गावनि गोजोनायखौ फोरमायनानै मेचनि समाव बेरेखा बादायारिनिफ्राय सेलेन्ज मोनायखौ फोरमायनानै गावनि सान्थौजो देरहानो हानायखौ फोरमायो। रासियानि गेलेगिरि गेरि कास्परभा 22 बोसोर बैसोआव वर्ल्ड सेम्पियनसिपनि थाखाय क्वालफाइ जादोमोन। गुकेशआ थानाय बोसोराव चीननि हंजौआव जालानाय एसियानि गेम्सआव सिल्भार मेडेल देरहादोमोन। 2015 आव बिथाडा एसियानि स्कुल चस सेम्पियनसिपआव आन्डार-19

नि बिमुं देरहानायजो केन्डिडेट मास्टर जादोमोन। गुकेशआ दासिमआव खेब 5 गल्ड एसियानि इयुथ सेम्पियन जाखांबाय। बिथाडा 2019 आव भारतनि लाइमोनसिन आरो मुलुगनि नैथि लाइमोनसिन ग्रेन्ड मास्टर जादोमोन। गुकेशआ बे टुर्नामेन्ट देरहानायवा 78.5 लाख रां मोन्दो। केन्डिडेटनि गासै राडारि बान्थाया 5 लाख इउर 'मोन'। बिस्वनाथन आनन्दआ टुइटरआव गुकेशनिसिम गहाम हामलायथि हरनानै बिथानि सायाव गोमानाय फोरमायदो। गुकेश डिनि आबुं मुख डमायराजु गुकेश आरो बिथाडा चेन्नाइनि थागिबि। 2006 नि 7 मेआव चेन्नाइयाव जोनोम मोनाय गुकेशआ 7 बोसोर बैसोआवो चस गेलेनायखौ जागायदोमोन। उदै समाव बिथाडा भास्कर नागैयाजो कचिं लादोमोन। नागैयाआ इन्टरनेसेल लेभेलनि चस गेलेगिरि महैरे चेन्नाइआव चसनि टिउटरमहैरे हाबा मावनानै दडा बेनि उनाव बिस्वनाथन आनन्दआ गुकेशनो गेलेमुनि सोमोन्दै गियाव होनायजो लोगोसे कचिं होयो। गुकेशनि बिफाया सासे डक्टर आरो बिमाया माइक्रबायलजिस्ट महैरे हाबा मावो।

आइपिएलआव आरसिबिआ गाजि जासिमिन सोरजिदो

गोदान दिल्ली, 22 एप्रिल: रयेल सेलेन्जार्स बेंगलुरु हान्जानि थाखाय आइपिएलआव गिबि खेब बिमुं देरहानायनि सिमाड फेलेंनि लामायाव सौहैबाय। आइपिएल 2024 आव कलकाट नाइट राइडार्सनि हेंथायै बादायनायाव आरसिबिआ 1 रानआव जेन्नायजो सोलिफु सिजनआव गेलेनाय खेब 8 नि गेजेराव खेब 7 मेचआव जेन्नाडो। जाउनाव हान्जानि प्लेअफआव सौहैनाय लामाया जेनायाव गोलेयो। बे मेचआव केकेआरनि हान्जया गिबियै बेटि खालामानानै 20 अभाआव 222 रान लादोमोन। बेनि देरहानायनि थाखाय फिन्नायाव आरसिबिआ जोबथा बलसिमआव 221 रानल 'लाहैरो हादो'। बे मेचआव



आरसिबिआ जेन्नादोब्लाबो टी-20 क्रिकेटनि जासिमिनआव मोनसे गिदरि रेकड लाखिदो। आरसिबिआ बे मेचआव टार्गेटनि बेटिआव ओंखारनाय समाव 35 रानसिमआव हान्जानि अपेनि केटसमेनफोरखौ खोमानादोमोन। बेनिफ्राय बिल जेक्स आरो रजत पातिदारनि गेजेराव थामथि उडके टनि थाखाय 102 शेयारि रान लायो। जेक्सआ 55 रान लानानै पेंभिलियनिसम गिदिं बोफिन्नाय उनावनो आरसिबिआ लान्थियै उडकेट खोमानाडो। जायनि थाखाय हान्जानो जोबथा अभाआव देरहानायनि थाखाय 21 राननि गोनांथि जाहैदोमोन आरो बे समसिमआव हान्जया 8 उडकेट खोमानां बायमोन। बेबादि थासारिआव करण शर्माआ स्टर्कनि अभाआव गिबि 4 बलआव खेबथाम 6 रान लानानै हान्जयाव मिजिंथि लाबोदोब्लाबो 5 थि बलआव बिथाडा आउट जायो। बेबादि समाव जोबथा बलआव आरसिबिनो देरहानायनि थाखाय 3 राननि गोनांथि जादोमोन। नाथाय बेयाव हान्जया 1 रान लाखानायनि उनाव नैथि रान लानो नाजानायाव उडकेट खोमानाडो। 221 रान स्करआव आरसिबिआ जेन्नादोब्लाबो नाथाय टी-20 क्रिकेटआव देरसिन स्करआव अलआउट जानाय रेकड थिसन्दो। कलकाटा नाइट राइडार्सआ

वाकिं एथलीट प्रियंका गस्वामी आरो अक्षदीप सिंहआ पेरिस अलिम्पिकनि कथा मोनबाय

गोदान दिल्ली, 22 एप्रिल: भारतनि वाकिं एथलीट प्रियंका गस्वामी आरो अक्षदीप सिंहआ अन्तल्याआव खुंजानाय वर्ल्ड एथलेटिक्स वाकिं टीम सेम्पियनसिपआव मोजाडै दिन्थिफुंनानै पेरिस अलिम्पिकनि कथा मोनफुंबाय। टप्स स्कीम बिथानि गेजेरजो एथलीट प्रियंका आरो अक्षदीपनि जराआ वाकिंनि मिक्स माराथन रेसआव 18 थि नम्बरआव जायगा मोनानै कथा आर्जिदो। बे सेम्पियनसिपआव टप 22 हान्जाफोराल' अलिम्पिकनि थाखाय क्वालफाइ जायो। प्रियंका आरो अक्षदीपनि भारतीय जराआ 42.195 कि:मि: जान्थायखौ 3 घन्टा 5 मिनट 3 सेकेन्ड समआव आबुं खालामानानै पेरिस अलिम्पिकनि थिखानाय समनि माकिंखौ मोनो हायो। बे रेसआव बाहागो लानाय गुबुन भारतीय एथलीट मनिता प्रजापति आरो परमजित सिंहआ 3 घन्टा 9 मिनट आरो 58 सेकेन्ड समजो 35 नम्बरआव जायगा मोनानै क्वालफाइ जानायाव फेलें जायो। मिक्स टीम रिले वाकिंआव हौवाफोर आरो आइजोफोर गेलेगिरिफोर सम



बादियै गोजान जान्थायखौ कभार खालामानांगौ जायो। जायनि फारिआव हौवा गेलेगिरिफोर 12.195 कि:मि: थाबायनाडो आरो बेनि उनाव फिन आइजोफोरा 10 कि:मि: जान्थायखौ कभार खालामानाडो। बेनि उनावसो हौवा आरो आइजो गेलेगिरिआ 10-10 कि:मि: थाबायो। खेबफोम स्टेजनि जागायजेन्नायनि सिगां 20

कि:मि:आ सेन्ज अभाआव थाखाय जायो। बे इभेन्टआव इटलीनि हान्जाया सनानि मेडेल आरो जापानआ सिल्भार मेडेल देरहायो। बेनि उनाव स्पेनआ थामथि नम्बरआव जायगा मोनो। वाकिं केटेगिआव माराथन मिक्स रिले इभेन्टआ पेरिस अलिम्पिकआव डेब्यु महैरे बाहागो जागोन। बे इभेन्टआ रिले महैरे हान्जाफोरजो

खुंफुंजागोन। पेरिस अलिम्पिकआ सोलिफु बोसोरनि जुलाइ-आगस्ट दानआव खुंजागोन। जायनि थाखाय भारतीय एथलीटफोर जासिमिन थिसनानायनि थाखाय नोजोर लाखिनांगौ। भारतआ टकिय अलिम्पिकआव गंसे सना, गंने सिल्भार आरो गंने ब्रन्ज मेडेलजो गासै गं 7 मेडेल देरहादोमोन।

भिनेश फगातआ फैगौ 4 दानखौ जर'खा सम फोरमायदो



गोदान दिल्ली, 22 एप्रिल: किर्गिस्ताननि बिस्केकआव जालानाय अलिम्पिक क्वालफायरआव अलिम्पिकनि कथा आर्जिनायै अलिम्पिकनि थाखाय मिजिंथिजानाय भिनेश फगातआ फोरमायनाय बादिब्ला, पेरिस गेम्सनि थियारिनि थाखाय 50 कि:ग्रा: लिस्थायायि केटेगिआव गाहायसिन केटेगिआव गावनि लिस्थायखौ लाखिनाया मोनसे गिदरि सेलेन्ज जानानै दडा। बिथाडा एसियानि अलिम्पिक क्वालफायरआव मोजाडै दिन्थिफुंनानै मोनबो पइन्ट खोमानाडालासे लान्थियै थामथि खेबनि थाखाय अलिम्पिक कथा मोनो हादो। भिनेशआ भारतीय रेसलिं फेडरिसननि बार' आफदगिरि बृजधुषन चरन सिंहनि हेंथायै धना होनायाव जर'खायै बाहागो लादोमोन। जायनि जाउनाव 1 खावसे बोसोरसिम बिथानोमोना

रुटिन बादियै प्रेक्टिस खालामनो मोनाखौ मोन आरो इभेन्टफोरनिफ्राय जानगारआव थानादोमोन। अन्तिम फंगालआबो 53 कि:ग्रा: लिस्थायायि केटेगिआव कथा मोनबाय। भिनेशआ गोलाव समनिफ्रायनो बे लिस्थायायि केटेगिआव सेलेन्ज होबोगासिनो दडा। मानोना मुंदांखा रेसलारफोरनिसिम अलिम्पिक कथाखौ रैखाथि खालामनयनि थाखाय गावसोरनि लिस्थायायि केटेगिआव सोलायनायनि अनगायै मोनबो राहा गैयामोन। भिनेशआ 50 कि:ग्रा: लिस्थायायि केटेगिआव अलिम्पिक कथाखौ रैखाथि होनायनि उनाव गावनि लिस्थायायि समानथायाव लाखिनो थाखाय गोबां बिथिडव नोजोर लाखिनांगोनि गोनांथिखौ फोरमायो। मानोना बिथाडा

गोलाव समनिफ्राय नाजाबोनायजो गावनि लिस्थायायिखौ 50 कि:ग्रा:सिम लाबोनो हादो। जेराव बे लिस्थायायिखौ लाखिलांबावनाया बिथानि मोनसे सेलेन्ज जानानै थायो। 29 बोसोर बैसोनि भिनेशआ गावनि मासल्सखौ गोरा फोरमायनानै बेनि थाखायनो गावनि लिस्थाया गोखैयै बारायो होन्नानै फोरमायदो। लोगोसे गावनि फीट जानाया गावनि लिस्थाया बारायनायाव मोनबो गोहोम गोर्लैया होन्नानै फोरमायो। सिगां फासै बिथाडा फैगौ 4 दाननि समखौ गावनि जर'खा सम फोरमायो। बिथाडा मोनबो अप्पन गैयैनि थाखाय गावनि लिस्थाया सोलायनायखौ फोरमायनानै गावनि गोसोजो केटेगि सोलायनायनि थांखि लायैखौ फोरमायो। लोगोसे बे नाजानायजो हारनि थाखाय 50 कि:ग्रा: केटेगिआव गावनि अलिम्पिक कथा आर्जिनायखौ फोरमायो। भिनेशआ बेनि सिगां रिय आरो टकिय अलिम्पिकआव मिजिंथिनि बाइजोआव दिन्थिफुंनानै मोन। नाथाय बे खेबआव बिथाडा जेखि-जाया थासारियावनो अलिम्पिक मेडेलनि सिमांखौ जाफुंहोना नाजागोन।

मेसिनि गलजो मियामीआ नाशभिले एफसिखौ फेजेन्दो



ब्युन्स आयार्स, 22 एप्रिल: आर्जेन्टिनानि सुपार स्टा रियनल मेसिनि गरनै गल सोनायनि मददजो इन्टर मियामीआ मेजर लीग सक्कार (एमएलएस) आव नाशभिले एफसिखौ 3-1 गलआव फेजेन्दो। मेसिआ बे मेचआव गरनै गल सोनायजो एमएलएसआव गावनि स्करिखौ 7 गलसिम आवगायहोयो। बिथाडा थानाय 2 मार्चआव अरलान्डनि हेंथाययैबो मेचआव गरनै गल सोदोमोन। मेसिआ नाशभिले एफसिनि हेंथायै गेलेनाय बे मेचआव गुबुन गरसे गल सोनायावबो मदद होदो। इन्टर मियामीनि थाखाय सांजिय बुस्केटसआ गुबुन गरसे गलखौ सोदो। लुइस सुआरेसआ मेसिनि गिबि गल सोनायाव मदद खालामदो। मियामीनि डिफेन्डर फ्रेंक नेरिआ नैथि मिनिटआव सुइसाइड गल सोनायाव नाशभिले एफसिआ आवगायजेन्दोमोन। बेनि उनाव मेसिआ मेचनि 11 थि मिनिटआव गावनि गिबि गल सोनायनि उनाव 39 मिनिटआव बुस्केटसआ नैथि गल सोनानै हान्जाखौ 2-1 स्करिआव आवगायहोयो। मेसिआ बेनि उनाव फिन 81 मिनिटआव फेनालिट क्रिकआव गावनि नैथि गलखौ सोयो।

2026 आव हौवाफोरनि आरो आइजोफोरनि हकी वर्ल्ड कापखौ बेल्जियाम-नेडारलेण्डआ दैदेनगोन

ब्रासेल, 22 एप्रिल: बेल्जियाम आरो नेडारलेण्डआ 2026 आव हौवाफोर आरो आइजोफोरनि हकी वर्ल्ड कापखौ जुथायै दैदेनगोन। बे दरनै हादरआ जुथायै मोननैबो टुर्नामेन्टखौ बान्जायगोन। इन्टरनेसेनेल हकी फेडरिसन (एफआइएएस) आ बेनि सायाव सिगांनो रोखा खालामदो। एफआइएएसनि आफादगिरि सैफ आहमेदिनि आफादगिरि सामलायनायाव वाकिं बर्डनि भाचुंएल जथुम्मानि समाव बे थांखिखौ लानाय जायो। इन्टरनेसेनेल हकी फेडरिसनआ फोसावलाइआव 2026 नि जुलाइ एबा आगस्ट दानआव नेडारलेण्ड आमस्टेडाम एबा एमस्टेलभिन् आरो बेल्जियामनि बाबरेआव बे मोननै टुर्नामेन्टखौ खुंफुंनोनि खोथा होदो। हौवाफोरनि आरो आइजोफोरनि हान्जाया बे टुर्नामेन्टआव बिमुनि थाखाय फिन सेलेन्जआव ओंखारलायगोन।



एफआइएएसनिफ्राय बे खेबआवबो टुर्नामेन्टफोरखौ खुंफुंनयनि फासै गोखोडै नोजोर लाखिदो। सिइअ थियरि वेइलआ एफआइएएसनिफ्राय गासैबो नेसेनेल एस'सिएसनिसिम साबायख'र होनानै मेचखौ बान्जायनायनि थाखाय बेसोरनि जुथायै बाहागो लानायखौ बाखायदो। सिगां फासै बिथाडा बान्जायनायनि थाखाय हादरफोरनि गोसो दुंखानायखौ बाखायदो। जायनि थाखाय खुंफुंनयनि बेटिआव नेडारलेण्ड आरो बेल्जियामनि नेसेनेल एस'सिएसनफोरजो खामानि मावनो मोनगोनखौ

लानानै गोजोनाय फोरमायो। लोगोसे दरनै हादरनिफ्राय जुथायै बे टुर्नामेन्टखौ जाफुं'सारे खुंफुंनोनि मिजिंथि लादो। नेडारलेण्डआ ब्रैथि खेब हौवाफोरनि वर्ल्ड कापखौ बान्जायगोन। जेयव बेनि सिगां बे हादरआ 1973, 1998 आरो 2014 आव मेचखौ दैदेनखांबाय। आइजो वर्ल्ड कापनि बाश्रा बुडोब्ला बे हादरआ 1986, 2014 आरो 2012 आव बान्जायखांबाय। गुबुन फासै बेल्जियामआ गिबि खेब हौवाफोर आरो आइजोफोरनि वर्ल्ड कापनि मेचआव बाहागो जागोन।

राजस्तानआव मुम्बाइनि हान्जाया फेलें जागासिनो दडा

गोदान दिल्ली, 22 एप्रिल: आइपिएलआव मुम्बाइनि हान्जाया फिन खेबसेबाव दिने फोथारआव ओंखारगोन। थामहिनबा बे हान्जाया दिने राजस्तान रयेलसनि सेलेन्जआव ओंखारगोन। राजस्तानआ सोलिफु समाव मोजां लामायाव दडा। जायनि थाखाय हान्जाया पइन्टनि फारिआव गिबिसिनआव जायगा मोन्दो। मुम्बाइनि बाश्रा बुडोब्ला हान्जाया जागायजेन्नाय खेबथाम मेचआव जेन्नायनि उनाव मोजां ट्रेकआव फैफिदो। नाथाय बे हान्जानो प्लेअफआव सौहैनायनि थाखाय साबसिनै दिन्थिफुंनानै गोनांथि जायो। दासिमआव मुम्बाइनि हान्जाया जयपुरआव मोजाडै दिन्थिफुंनानै। थामहिनबा बे हान्जानि थाखाय राजस्तानखौ

फेजेन्याया गोलै जानाय नडा। मुम्बाइआ थानाय 12 बोसोरव राजस्ताननि फोथारआव राजस्तान रयेलसखौ हादबनो हायाखै। जयपुरनि सबाइमा सिंस्टेडियामआव हादिंक पन्डियानि केपेनआव मुम्बाइ इन्डियान्स आरो सन्जु सेम्पसननि केपेनआव राजस्तान रयेलसनि

गावसोरखौ प्लेअफनि फासै आगानसे आवगायहोनो नाजाबावगोन। बे मोननै हान्जानि हायाखै। जयपुरनि सबाइमा सिंस्टेडियामआव हादिंक पन्डियानि केपेनआव मुम्बाइ इन्डियान्स आरो सन्जु सेम्पसननि केपेनआव राजस्तान रयेलसनि

राजस्तानआ बे हान्जाखौ उल्थायै गादबनानै लाखिदो। सोलिफु बोसोरनि आइपिएलआव

गेजेराव हेडटु हेड दिन्थिफुंनयाव नोजोर होयोब्ला दासिमाव बादायनाय मेचआव खेब 13 मेचआव राजस्तानआ देरहाबाय आरो खेब 15 आव मुम्बाइ इन्डियान्सनि हान्जाया देरहादो। नाथाय 2012 आव जोबथा खेब राजस्तानखौ बिसोरनि नख'रारि फोथारआव फेजेनयनि उनाव

राजस्तानआ जयपुरआव खेबबेनि गेजेराव खेबथाम मेच देरहाबाय। जेराव बे हान्जाया गुजराट टाइटान्सजो ल' खेबसेल' मेचआव जेन्नादो। जयपुरआव आरआर आरो आरसिबिनि गेजेराव दासिमाव गेलेनाय सोलिफु बोसोरनि खेब 7 मेचआव खेब 5 आव राजस्तानआ देरहाबाय।